






15, 458.

Ne. 9700.



Ne 9700





*Adhaerere debet ad edit. Herburti  
Chron. Polon. ib. eod.*

#  
MICHALONIS LITVANI  
DE MORIBVS  
TARTARORVM,

LITVANORVM ET MOSCHORVM, FRAGMINA X.  
multiplici Historia  
referta.

ET,

IOHAN. LASICII POLONI  
DE DIIS SAMAGITARVM,  
CETERORVMQ. SARMATARVM,  
ET FALSORVM CHRISTIANORVM,

Item

DE RELIGIONE ARMENIORVM.  
Et de initio Regiminis Stephani  
Batorij.

Nunc primum per

I. IAC. GRASSERVM, C. P.

ex Manuscripto Authenticis edita.



BASILEÆ,  
Apud CONRADVM WALDEKIRCHVM.

M DC. XV.







1038851



ILLVSTRISSIMO DOMINO,  
OCTAVIANO ALEXANDRO,  
PRINCIPI PRONSCENSI,  
DOMINO IN BERESTETZKO,  
ET RHEZAN, &c.

DOMINO MEO GRATIOSISSIMO.



**Q**UOTIES Heroicum tuum animum, ILLVSTRIS-  
SIME PRINCEPS, in familiari  
illa conuersatione, quae rerum Theologi-  
carum & Historicarum igitur, perquam  
gratiosè haecenus dignatus es, tacitus mecum  
arbitror & suspicio, non possum non diuina  
illius meminisse sententia, Magnum Virtutis principium, vt  
paulatim exercitatus animus, visibilia & transitoria pri-  
mum commutare, vt postmodum possit derelinquere.  
Delicatus ille est adhuc, cui Patria dulcis, fortis autem  
cui omne solum Patria, perfectus verò cui mundus exi-  
lium est. Patria enim, quae te in clarissimorum Magnatum si-  
nu quam splendidissimè fouisset, tenerrima adhuc aetate Ado-  
lescens, cum D. LV LIO, fratre tuo unico, quem Deus ad cele-  
stem Patriam ante biennium Massilia euocauit, discedens, non  
modò ex remotissima Polonia prouincia, in supremos hos Ger-  
mania fines profectus es, ubi omnium Facultatum celeberrimi-  
orum Doctorum Lectiones, Disputationes, & Promotiones,

Hugo de San-  
cto Pictore  
in Didasc.  
L. 3. c. 2.

)( 2



# DEDICATIO.

que singulari quodam fato Basilea sunt creberrimæ, tanto e-  
gregia quævis discendi studio annis aliquot frequentasti, ut Ec-  
clesiis illis, quas Deus in Dominis tuis Amplissimis sibi collegit,  
gratulari merito possimus. Energetem illas habituras, qui in  
Virtute & Doctrina multiplex, ipsis quam optime su prospectu-  
rus: sed & Gallias, Italiam, & ad Balearicas usq. Insulas Hi-  
spaniam tanta felicitate perlustrasti, ut pro ingenij tui sublimi-  
tate illarum regionum, Linguarum aquæ ac morum, legumq.  
singularem & admirandam prorsus acquisueris notitiam.

Efficacissimum autem ad huiusmodi Heroicos ausus incen-  
tium fuit, Maiorum Tuorum religiosa memoria. Quantum  
enim, Deus bone, Tritau tui Pater fuit, RYRICVS, potentis-  
simus ille totius RYSSIAE Princeps, qui duodecim suis filijs,  
septem Amplissimos Ducatus reliquit, Kyoniensem nempe,  
Vlodimirensem, Halicensem, Czemiechouensem, Preaslauen-  
sem, Rhezanensem, & Pronscensem.

Tritauus tuus, quod cum Rhezanense celeberrimum Pron-  
scensem Ducatum possedisset, illustrissimum illud PRONSCIE  
nomen in hunc usq. diem posteris reliquit.

Atauum tuum GEORGIVM PRONSCIVM, Casimirus  
Magnus, Polonia Rex tanti fecit, ut illum, cum apud Tarsaro-  
rum Ducem detineretur, augustissima Legatione liberaret, &  
quam honorifice Vilnam in Lituaniam deduceret, eumq. con-  
tra Moscum cum exercitu mitteret, ipsi etiam pro impetrata  
victoria, & alijs singularibus præsitiis patria officijs, communi  
totius Regni suffragio, amplissima Dominia donaret. Duxit ille  
serenissimam Principem Solomariensem, Heroinam laudatissi-  
simam.

Frater eius, cuius iniurijs in diuisione hereditatis animosè  
restitit, Magni Moscorum Ducis sororem duxit, ex qua duos re-  
liquit filios, ex quorum posteris vnus, superiore seculo proprijs  
sumptibus tria millia Equitum, contra Stephanum Batorium  
Magno Moscorum Duci in auxilium adduxit.

Dice-

# DEDICATIO.

Dicebantur hi duo fratres, ut & ipsorum Maiores, Magni  
Duces Pronscenses, ut ex pactis & privilegijs Lituania Can-  
cellaria abundè probat: Pacta enim & fœdera Duces Pron-  
scenses cum Polonia Regibus pepigerant.

Abauus tuus Hleba, uxorem habuit filiam Tiuonis Vilnen-  
sis ex familia Podbipentorum, qui contra Tartaros fortissimè  
dimicans, prope Mynscium obiit.

Proauus tuus, Vrbs Baiala Cerkievv, fundator, pro præsitiis  
Reipublica Polonica varijs beneficijs Palatinatum Kyoniensem  
& aliquot in Russia finibus præsitaras meritus est.

Auus tuus Fridericus, Palatinus Kyoniensis, duxit Bogus-  
si Bohouitini, Magni Lituanie Ducatus Thesaurarij, Viri Maxi-  
mi, & apud exteros Principes acceptissimi filiam, cuius soror  
Tenczynio Palatino Cracouiensi primò, deinde Principi Radzi-  
uilio Palatino Vilnensi nupsit, ex quo, Deo ita benedicente, Io-  
annem qui in Dania obiit, & Illustrissimorum Principum Sclu-  
censium, Georgij videlicet, Simonis & Alexandri matrem  
progeniuit.

Aui huius tui Gener fuit celeberrimus ille Regni vestri Se-  
nator D. Ioannes Zboronius, Castellanus Gnesnensis, cuius in-  
dustria Rex Stephanus Batorius feliciter in bello Dantiscano  
usus est.

Pater verò tuus Alexander Princeps Pronscensis, omnes pe-  
nè Adolescentia & Iuuentutis suæ annos hinc inde apud exte-  
ros peregit, linguis, bonis artibus & moribus, ac omnigena Vir-  
tute, naturali quodam instinctu deditissimus, ac propterea non  
minus literarum ac litteratorum, quam omnium omnino in  
quacunque salutari scientia excellentium per totam suam vi-  
tam Mecenas, & Patronus cum admiratione summus: ubi ve-  
rò ad perfectiorem progressus est ætatem, Heroicarum Virtu-  
tum suarum primordia, in aula Caroli I X. Francorum Regis,  
quasi in amplissimo mundi Theatro, diuersis conspicienda ex-  
hibuit nationibus.

):( 3



# DEDICATIO.

*Electiois noui Regis tempore in Poloniam reuersus, ob amorem Patria, & maximarum Virtutum diuinam perfectionem, quã omnes Regni Praecones mirabantur, in senatoriũ ordinem ascitus, Castellanus Trocensis factus, & vnanimi Magni Ducatus Lituania consensu, cum Palatino Vilnẽsi Legatus in Gallias electus est, ut Henricum Regem peteret, & in Polonia Regnum deduceret, apud quem quanta polluerit gratia, nemo est in tota Polonia qui ignoret.*

*Quam promptus autem ille fuerit ad quauis Patria prestanda officia, testatur Poloczko, Pskoua, &c. dum proprio sumptu militem satis numerosum Regi Stephano adduxit. Nec vlla vnquam Tartarorum contigit incurfio qua non fortiter heroicam suam frontem ostenderit, patria salutem non consilijs modò, sed suis manibus strenuè defendens. Testatur hoc tota Volinia & Russia: testatur Olisko, vbi exigua suorum militum & Alicorum manu, cohortes Tartaricas inuasit, & per duas horas praeliando, te inter ceteros hostes Polyphemum quendam Tartarum, furiosè sese defendentem, proprijs manib. occidit, victoriãq. potitus est.*

*Extollit illustrissimum huius Alexandri nomen Redka, vbi hostium quam plurimos cepit: Trophæa meditatur Beresteczko. Norunt etiam alia quam plurima loca, quàm caute vigilarit Tartarus, vbi Heroem Pronscium appropinquasse intellexit.*

*Vt semel autem omnia dicam, nullam vnquam pientissimus tuus Pater, de Patria, quin vniuerso Christiano orbe bene merendi, & infideles Barbaros domandi intermisit occasionem, non sumptuum magnitudini, non capiti proprio pepercit. Totum se suasq. res omnes Deo & Patrie, animo quàm religiosissimo semper consecrauit.*

*Laudatissimis huiusmodi Maiorum tuorum vestigijs, ut insistas sedulo, Affinis tui desideratissimi, Illustris & Magnifici Herois D. RAPHAELIS LESCIRII, Comitũ de Lesno &c: Palatinidis Prestensis, Cuiantensis, Castelani Policensis &c: hortatur*

# DEDICATIO.

*hortatur & illicit exemplum, qui inter Regni vestri Procures, Virtute & Eruditione eminentissimus, singulari studio, Dei gloriam, Ecclesia Pacem, & Reipub. felicitatem usq. & usque promouet.*

*Quando verò Illustrissime Princeps, Germanorum, Gallorum, Italarum & Hispanorum ingenia & mores inspexisti hactenus prudentissimè, & post reditum tuum in Patriam, quem nunc destinās, procul dubio cum Tartaris & Moscis nonnumquam sis armis congressurus, opusculum hoc, quo huiusmodi hostium vita describitur fidelissimè, in clytuo tuo nomini inscribere & consecrare meritò volui. Prior autem libellus anno 1550. in gratiam Sigismundi Augusti, Polonia Regnum suscipientis, alter verò anno 1580. Alexandri Ducis Selucensis conscriptus fuit. Deprehendi vtrumque manuscriptum apud Amicum quendam inter chartas celeberrimi quondam nostri Typographi Petri Perna, cui vt ederetur, ex Polonia missus fuit.*

*Suscipe ergo Musas, Regi maximo, & Principi tibi agnato quondam consecratas, suscipe Musas redituas ex Polonia olim Basileam missas, vt lucem viderent publicam. Faveat Deus Optimus & Maximus Tutelaris, omni, quod felicissimum auguror, quando vel Opusculi huius Genius, non nisi tecum, & sub Illustrissimi tui Nominis auspicijs, in Patriam redire voluerit. Vale Princeps Illustrissime. Basilea Kal. Octob. 1614.*

Illustrissimi tui Nominis

studiosissimus

IOHAN. IACOBVS  
GRASSERVS, C.P.





*MICHALONIS LITVANI,*  
DE MORIBVS TARTARORVM,  
LITVANORVM ET MOSCORVM,  
fragmina decem, multiplici  
Historia referta.

FRAGMEN PRIMVM.



AMETSI Tartari, barbari & inopes habeantur à nobis, gloriantur tamen continentia vitæ, & antiquitate gentis suæ Scythicæ, asseuerantes eam semen esse Abrahæ, & nemini seruiuisse vnquam, licet vexatam interdum ab Alexandro, Dario, Cyro, Xerxe alijsque Regibus & populis potentioribus: & varias nunc diuisam in Ordas, id est, nationes. Siquidem vltra vicinos nobis Precopenses, complicesque eorum Belhorodenses, & Dobricenses Moldauicæ finium accolæ, Ordę sunt potentes, Precopensibus infensę, Orientem versus. Alia Nahai, alia Chastorakani, alia vltra amnem Tanaim, qui Volha appellatur, Zavvolscæ, Cæsaris Bati Vngariæ vastatoris patria, Moschorum olim & omnium Ruthenorum dominatrix, Nahaiensibus nunc adhærens, alia Kozanij, alia Kazaczka, item Buchar, Samarchan, & alia dicuntur plures, xii. Imperatoribus dispartitę, vt promiserat Dominus progenitorę eorum Ismaëlem Genes. 17. duodecim duces generaturum, & euecturum in magnam gentem. Ex omnium autem nationum Tartaris soli tenuiores, sed regionibus nostris citimini Precopenses, infesti sunt nobis, cum ignauia freti nostra tum vicinitate, locorumque opportunitate receptaculi sui. Habent verò Precopenses receptaculum, suapte natura mu-

12. Orda  
Tartarorū.



*Taurica  
Chersenesus.*

nitum. Lacus enim duo palustres, quorum alter Meotis dicitur ex mari in continentem ad circiter triginta milliaria, in longum porrecti, & seorsum tantundem penè in initiis & progressu suo distantes: finibus verò ad inuicem reflexi, & angusto quodam interstitio sicco cohibiti quin congregarentur, desinentes: iunguntur ibi fossa & vallo altius exaggerato, complectente portam, quæ vnica est ingrediendi prouinciam illam per aridum. Vnde & Castellam ad portam illam sitam, & tota sinu illo inclusa peninsula, appellatur à nobis Prekop, cui Tauricæ aliàs nomen fuisse fertur: Incolatus verò & imperium Græcorum Trapezuntinorum, ut hucusque retinent Græci suam & ibi linguam Græcam & religionem. Adiacet autem peninsula ea ipsa mari Pontico, quod illa ex parte pontus Euxinus dicitur, & quamuis munita sit situ, non adeò tamen illis suis, nec lacubus amplis, nec fossa nec vallo arduis, neque Castello firmo, ut arceretur à transitu exercitus paulò instructior. Et peruenitur ad portam Tauricæ unicam illam ab arcibus vltimis Lituanie Czerkasi & Braczlavy, diebus sex, graminosis semper & planissimis vbique campis, non monte interpolatis vsquam, non sylua non palude, nec amne transmissu difficili, præter Borysthenem. Sic enim ipsa Taurica citra Alpes & maritima, quæ montosa passim, habet & syluosa, & quæ nunc ab Aboriginibus Græcis inhabitantur, aliàs verò, tota est campestris, Tartaris illis incolatum præstans, & ubique victui mortalium commoda & facilis, facilis admodum Cerere, Libero, carne, & sale. Siquidem sal ibi in lacunis, quibusdam aquis in se, ad instar glaciei, à calore solis concrevis nascitur, à solstitio æstiuale copiosus & pellucidus, nonnulli ibi ut crystallus. Et frumentum omne, ac vnam vini generat ibi copiosè tellus, semel subacta, & fronde occata utcumque. Pecora item & iumenta hyeme quoque in pascuis, & sub dio semper fouet læta, quæ etiam fatigis exinanita macilentia & strigosa, postquam abijciuntur, ibi in campo repin guescunt. herba floccida, calcitrata ex niuibz quæ sita, haud infelicius quam melioribus pabulis & sub resto apud nos. Quoniam & celum ibi est aliquanto clementius, & terra vbi canola ibi salsa. & herbarum genus sapidius quoddam, semper virens, & mirum in modum iur-

*Salum Taurica.*

menta vegetans, quod appellatur Tipecz. Vnde tantam olim frequentiam incolarum fuisse ibi memoratur, quod singule quædam illic ex vrbibus Græcorum, millena habuerint templa, & clero interim insolenti adeò, quod non nisi equites ingrederentur sanætuaria antistites & Archimandritæ eorum. Atque nunc etiam vrbes ibi nonnullæ quamuis pessundatæ, amplitudine tamen ambituum suorum & ruinarum, superbæ olim fuisse apparerent, & præsertim quæ à nobis Solthoth, à Moscis Krym, à Græcis Theodosia appellabatur quondam, & metropolis vetusta Korsunij, quæ genti Ruthenorum princeps dedit baptismum & nomen Christianum, postea verò prædam gentibus nostris, excisa ab eis. Vnde Kiovvja nostra in templorum suorum lithostrathis, asarotis, & incrustamentis, retinet hucusque certa prædæ illius insignia, è quibus & Gnesnensi Basilicæ valnam largita est. Et illa ipsa Korsunij tractata sic à nostris, dedisse fertur iactura sua necessitatem Tauricenses Christianis, luxui & ignauie deditis, recipiendi in suppetias ad feudalem incolatum, reprimendis gentibus nostris, manum Tartarorum ex Orda Zavvolska adscitam. Et sensim deinde inualefcens ibi illa Tartarorum vis, ad iustumque populi examen propagata, protulerit sibi in principem Temirkuthla quendam sanguinis sui, appellato eo Cæsare. At progenitores S. Mris Vestræ perdomitis Cæsariis illis, iniquis Græcorum Vasallis, dabant eis in Cæsares, subditos suos hinc ex Litvania Tartaros. Vltimus verò ex Litvania Cæsarem Aczkirei, hic apud Troki natus, & hinc à divo Withovvdo ad imperium illud missus, genuit imperans ibi in Taurica filium Menglikirei. Menglikirei verò modernum Cæsarem Sapkirei & fratres eius nati & imperio priores, Machmethkirei, Saderkirei & Chaskirei. Sic enim nobili recepta hinc progenitoria sui nomenclatura, gaudet nunc omnis sequens eum in fascibus illis posteritas. Hæc igitur est Kireorum stirps, dextra forti progenitorum S. Mris Vestræ ibi plantata, quæ nunc referendo gratiam prouectionis suæ, iuge faciescit nobis negotium. Atque vigente sic Taurica & populo & imperio iam aduenarum: vrbes tamen eius Mancup, Cassa, Kercze, Kozlevv, & aliæ maritimæ, seruauerant se immunes ab illis, donec Turcica manu, opt-

*Christiani  
in Taurica.*

*Tartari in  
Tauricam  
acciti.*

*Vixit Pri-  
vondus  
1380.*



Conditio  
Græcorum  
in Taurica.

bus Constantinopolitanis exaucta, caperentur ab annis hinc circiter septuaginta. Et illinc missi sub iugum Turcæ, pendunt ei census, à capitibus suis singuli illis Aboriginum Græcorum superstites. Qui tamen & nunc agricolæ, videlicet vinitores & pastores, non inopes sint, imò etiam non sine argentea suppellectili plerique, utpote in tranquillitate & iusticia publica, rationabiliore Ethnicorum administrati viuentes, minùs tamen iucundam agunt ibi vitam. Quippe, qui nullo honore digni, imò nullius omnino reputationis habentur à potioribus rerum Machometicis, ac omni illorum nedum commercio, sed & intuitu non toruo dedignantur, angarianturque laboribus, dominicis præsertim, ac etiam Paschalibus diebus, ipsimet argenteæ suppellectilis domini. Nequaquam enim retinet auctoritatem ibi Christianus, nec in seruum nec in filium paulò proteruiorem, qui scilicet Magistratui se præsentandum duxerit semel. Atque etiam ipsi patrifamiliās mutandus est status, si defertur præsumpsisse de religione ipsorum quicquam verbo, aut saltem digito uno, & minus etiam serio protenso.

Iam verò quàm inconstans sit vicissitudo rerum, vel ipsa sufficit indicio Taurica, videns nunc mutatum sic popularium suorum statum, & patritiorum superstites, honore, libertate simul ac patribus orbatos, in servitutem redactos, spreto, capite diminutos, capiteque censos Machometicis, & antistites illos, insolentes quondam ecclesiarum Dei contemptores, contemptos nunc ipsos, & abiectos, obreptare sub crucibus Tartaris & Turcis. Urbes quoque suas opibus immensis, superbia, læticia, ac omni luxuriæ strepitu perfundas, dehiscere nunc plerasque inanes, ceteras verò solo æquatas, obsoletis iam & nominibus; & imperitare nunc sibi, non Christianos nobiles, & nativos suos patronos, sed peregrinam Ethnicam, ac non ita pridem servitute emersam, atque & imperio simul, & libertate donatam hinc Vasalorum stirpem. Ad eò verò increbuere in Taurica Tartari, quod circiter triginta millium exercitum compleant ad bellum, sed coacti, ut solent vniuersi, & gregarii ac imbelles, quicunque saltem valeant conscendere equum. Ut me præsentem ibi, dum medietatem eorum, & filium suum mitteret Cæsar, in subsidia Turcæ profici-

Numerus  
Tartarorum  
Tauricanorum.

scenti nouissimè in Vngariam, quindecim millia eorum tunc enumerata sunt. Proficiscebantur autem quamuis lectiores illi, consueto tamen apparatusuo, inermes videlicet plerique, & vix decimus aut vigesimus quique eorum pharetra fultus aut framea, lorica vero multo rarior, sed alij scipionibus saltem muniti osseis, alij ligneis, alij vacuis telorum accincti vaginis. Clypeorum autem & hastarum, vel huiusmodi armorum generis, expertes penitus. Sic enim semper illi, nec armis, & nec cibariis præter non nihil milij tosti, aut casei comminuti, & neque ullis onerantur impendio ad bellum impediendis. Verumtamen nemo illorum, sine pluribus recentibusque loris proficiscitur, & præsertim quando nostras excursandum est eis in regiones. Quoniam tunc solliciti sunt vinculorum, ad vincendum membra nostra, plus quam armorum ad tutandum sua. Equorum vero semper fulciuntur ad bellum copia, ut magna pars exercitus eorum, qui nos singuli ducunt equos, eosque intactos. Vnde excursiones & omne iter, crebra huiusmodi equorum mutatione freti velocius perficiunt, & hostem insequentem se effugiunt facilius, ac etiam terrefactant amplitudine vestigii sui, & non metuunt ipsi in copia eorum fatigam nec famem. Præstant etiam in bello tolerantia, famis, sitis, fatigæ, peruigilij, æstus, algoris, & omnis inclementiæ cælestis omniumque ærumnarum. Nam expeditiones bellicas perficiunt absque curribus semper, & absque omni com meatu, præter illam quam dixi equorum copiam. Solitudines item camporum vastas, inuias, brumali etiam tempore, altitudine niuium & pruinis acerbis, quamuis excoctis dura niue & glacie equorum cruribus, haud ægrè tamen & haud grauati superant. Amnes amplos rapidos, atque hiberno etiam rigore, Aquilonumque & glacierum fragoribus horridè stridentes & traiectu difficiles, absque tamè nauigiis, sed saltem equorum ipsi iubis adnixi, sarcinis vero ad caudas super tignis, seu arundinum fasciculis alligatis, tranando inconcitantè expeditè & promptè transmittunt. Et in prælio pugnant, fortius multo quam Moschoi, quamuis minus armati, & semper primo in congressu, sinistram aduersi exercitus, conantur occupare cornu, quo dexterius ipsi petant sagittis. Sæpe quoque in fugam versi, terga dando, re-

Bellica expedicio.

Traiectus  
fluminum.



*Tartari cre-  
bro à Litua-  
nis & Polo-  
nis victi.*

*1519. mense  
Augusto.*

*Vita Tartarorum.*

sistunt, & hostem insequentem se diffusum sparsim, interceptant ex insidijs, & sic eripiunt non nunquam victi victoribus victoriam. Quando verò præter technas & strategemata, sed recta & cominus, collatis signis, venit conferenda cum eis manus, prævalent tunc in eos pugnatōres nostri, etiam si non paulò pauciores fuerint. Id quod crebrius experti sumus, sub victoriosissimis vexillis diui parentis S. Maiestatis V. Nam & post infelicem Christianorum cum Machometicis, patruelis verò S. Maiestatis V. Regis Ludouici ultimam pugnam, mense quinto, calendis Februarijs, Anno Domini supra mille quingentos & viginti septimo in campis planis illis prope Czerkassi ad fluvium Olisanicza, viginti quinque millia illorum, Precopensem Tartarorum caesa sunt ad internecionem à nobis, qui non plures fuimus ibi, quam quingenti & ter mille. Et ante apud Kleczko, desiderata sunt septem & viginti millia eorum, prostrata à novem millibus nostris. Ita quoque alias, & apud Davidis Castellum & apud Strefsino, Czezersko, Lepussino, & in campis etiam vastis illis, in Lebedino, & ad templum album, & ad fluvium Sula, & alijs in praelijs, quotquot ævo presenti fuerent genti nostræ cum illis, expertum est robustiores esse nostros. Nam & apud Sokal, non robore virium superatus, sed dolo & loci iniquitate circumuēsus ab illis, succubuit exercitus noster, perductus insidiosè in aream oppidi recens exusti, crebris præcipitijs cellariorū, id est, antris, cauernis & cryptis subterraneis dehiscens. Et illinc primum arigi cœpit in nos cornu stirpis Kiriorum, perlatis sibi in Tauricam exuuijs cruentis militis nostri. Atq; deinde apud Oczakovv, tametsi fortis itidem ac etiam victor in illos fuerit miles noster, at imprudens interim, ut qui donauerit ultro victoriam victo Oslam Soltano, mittēs ad eum in Castellum duces suos colloqui gratia, ignarus, dictū esse, circa rem bellicam dolus an virtus quis in hoste requirat? Sic igitur semper robustiores fuerent nostri Precopensibus præter technas, dolos & strategemata illorum. Vita autem Tartarorum, qua gloriantur, est prisca, pastoritia, quam olim in aurea ætate, sancti vixerunt patres, & ex qua Duces etiam eligebantur populis, regesq; & Prophetae, dicente quodam eorum, tulit me domi-

XXX

nus cum sequeretur gregem eorum. Ita enim agunt hætenus Tartari, sequendo greges, & peragrando cum eis campos hinc inde. Septa nulla habent, nec domos, præter tabernacula gestatoria, ex viminibus & arundinibus compactis, cilicijs velata, storeis, & mattis scirpeis munica, quæ vxoribus & pueris referta, vectant secum in plaustris. Terram non colunt, etiam fertilissimam, contenti spontaneo fructu eius, herba ad pascendum pecus. Vnde iuxta Salomonis consilium, lacte solum absq; pane & sycera viuunt, sobrii & abstemij. cum lege quoque prohibitum habeant porum vini, ac esum suillæ. Et quamuis cæterorum pecorum ac iumentorum, etiam equorum vescantur carnibus, non tamen apud se, nisi penitus mortuis aut penè morticinis, parcendo scilicet viuidis gregum suorum. Nam in gregibus totam suam conditant substantiam. Nihil immobile possidentes priuatim præter puteos, & eos contribulibus quibusque communes. Mobilium etiam curæ, atque oneri non impendit se applicant, præter, quotidianam & eam tenuem vtenfilium suppellectilem & equitatus, bellicæq; rei leuissimum etiā instrumentum, ad quod solum accurati sunt, præter verò id, ad aliud operis profani, alicui rei nauare operam, virum ingenuum dedecori habet, quo sedulius obsequuntur præscripto legis suæ, vi & armis propagandæ. Atque in ea feritate nihil habent antiquius temperantia & continentia, viuuntque citra exuperantiam ac defectum vltimum omnes. Vnde quemadmodum in sacris litteris dicitur, scio & satiari & esurire & abundare & penuriam pati. Item qui multum, non abundauit: & modicum, qui non minorauit. Ita nunc in barbaris illis, nemo abundans suffocatur ingluvie, nec egenus extinguitur fame, neque algore conficitur, nemoq; mendicat in tanta eorum inopia & penuria rerum. Nam ut non frequens apud eos heluo: sic non fame laborans, nec mendicans nec fraudulentus, alieni haustor, nō litigator, nec iudex iniquus, non testis peruersus, non pererator, item non fur nec latro. Vnde minimè opus est apud eos angustiam quinquam sollicita rerum suarum custodia, nec se armis onerare domi ad priuatam sui defensionem. Nam iter habenti intra regionem eorum ferre telum, enorme & illicitum est. Sanctè enim colunt illi apud se pacem

*Opes.*

*Labor.*



*Iudices reli-  
giofi.*

*Magistratus  
venerentia.*

*Hospitali-  
tas.*

& iustitiam, reddendo unicuique quod suum est, integrum non imminutum in gratiam magistratus, ex decimatu, nec vlllo alio nomine. Non quæstui etenim, sed pietati, impij ethnici illi habent iudicandi officium. Quod etiam est eis non laicum, sed religiosum, & per religiosos id exequuntur Cadios, qui eò religionis inicianur, peculiariter secundum iusiurandum, iam alioqui lecti tales, qui minimè inhient rebus profanis, de quibus alios iudicaturi sint. Et quo expeditius vigeat iustitia, nequaquam iudicium ibi protelatur subterfugijs cauillarorum, nec obtenditur calumnijs vitiligatorum. Siquidem reus diffugium captas, dum per attactum oræ vestimenti sui, vocatus ab actore in iudicium non paruerit illico, extunc velut compertus iam in reatu vapulat. Verberatur enim fuste, certo & ex lege domini præscripto plagarum modo. Actori item & testi locus in iudicio non est, qui necessaria salutis non satis perfectè ex lege calleat, aut qui gustasse aliquando vinum seu alio notatus vicio deprehenditur. Parent quoque foro eidem, hoc est, Cadij iudicio, & proceres ac duces cum popularib. pariter & absq; discrimine, ac præter summum principem, cuius Maieitati plus etiam quam humanæ deferunt, ipsi in vniuersum, atque ad vnum omnes vno eodemque iure viuunt. Item & habitu conformi & victu compari, reddunt se pariles, nefas videlicet & piaculum habentes, fuste etiam expiandum, præsumi à quoque gentis suæ, vt vestitu præcinctiue, aut pileo seu cæsarie vtatur, non suo patrio ac verusto ritu: utve cibarium privatim à se promptum, non commune habeat unicuique præsentium, aut sumat illud esui parte ex aliqua patronus ipse prius, quàm expositum in medium, frustularim fuerit concisum, & commissum diligentius, vt eadem scilicet cederet qualitate cuilibet præsentium. Et in itinere nedum viaticum commune habent, sed etiam inservitant maiori natu aut imbecilliori cuilibet, alacrius vnus præ alio. Domi hospiti cuilibet obiterario etiam, & ignoto exponunt gratuito, & cibum & nidum, sed eminus à serie statuarum suarum. Quoniam aliàs non adeò iam sunt ciuiles, quippe qui foeminas suas ab hospite, amico etiam & conuiuia quantumcunque gratiofo, conspici nequaquam licitum

licitum habent, tenentq; miseras, caveis suis additioribus reclusas, & nedum conuiuiorum sed Synagogarum quoq; & omnis consuetudinis forensis penitus expertes, laborib. etiam omnib. satorijs & sutorijs reiectis in eas, sed neutiquam tamen inuitas. At ipsi interim non sunt contenti coniugijs earum, singuli sin- *Polygamia.* gulis, more hominum prisco, in hoc se iactitantes, itidem & lege sua suadente vxores unicuiq; quaternas, & in singulas earum pellices denas. Et quo perfectiores præstent se viros, non diuitias quærunt sponfarum, nec species earum corporales, copulanturq; eis, minimè à se antea in facie visis, sed animis dūtaxat moribus, quæ earum exploratis, & non dedignantur in coniugia ancillas quoq; suas captiuas, ac emptitias. Vnde habet eas in matrimonijs constantes, morigeras, inuicem cōcordes, & pellicib. suis in gratiam maritalem æquanimis, item pudicas, vt inauditum sit pe- *Adulteria inaudita.* nitus in eis adulterij crimen, capitale alioqui, & nece expiandum illico. Et præterea, cum intelligant barbari illi, nihil salubrius esse gentibus virtute & disciplina militari, in arduitateque consistere virtutem: Ideo molliciem & voluptates auersando asperitati vitæ, nec non equitatu ob rem bellicam studet ex infantia, & iam inde ab incunabulis gestantur inequitando, nec desuescunt equitare vel decrepiti. Vehiculi verò vsum veruli quoque vel valetudinarij detestantur molliciem deuittando & parcendo equis. Parci enim sunt equorum, adeò quod Baro etiam eorum, equitet intra patriam solus, qui foris centenis concomitatur equitibus suis peculiaribus. Et mulier apud *Famina barbarum rebus.* illos etiam primaria, & vel Cæsaris necessaria regiam accessura, non verecundatur caueæ suæ obturatæ reclusa, auro vel gemmis intro nitens, boue vehi vno, aut propter plaustrigrosiciem duobus. Equum autem vel deterrimum iungi vehiculo, nefas est & religio cuilibet eorum, millenos etiam in equitijs suis habenti equos. Est autem vita hominum illorum tetrica, sic & austera vulgo eorum communis, at non Principib. Quoniam Principes *Vita Principum.* Scytharum in publica populorum suorum frugalitate ipsi lauitius inerim viuunt. Vt Precopentis modernus Cæsar, negotio bellico in filios nūc reiecto, ipse propensius voluptatibus intendit, in copiarum mulierum suarum, intra viridarium quoddam,



amoenitate loci, nec non ædificatu, cultu, herbarumque ac arborum varietate, & quincunciali earum situ elegans. Quo quidem in Paradiso suo, hospites etiam exceptat ille, conuiujs opiparis, licet ipse quidem velut fastidio & contemptu diuitiarum ligneis & nudis velcens ex vasculis, attamen auratis inniten per ananias & cubitis & pedibus ad argenteamq; discumbens munda, aureis & gemmatis oneratam phialis & varijs lasciuens dapibus, nec non melodijs fidium, cymbalorum, Crota-  
Populi.

lorum, Psalmorum, alijq; nugis ostentans delicias suas, liberiusq; licere sibi ea præsumens in publica populi continentia. Agunt verò populi Tartarici continenter auscultantes Sacrae Scripturae dicenti; Vinum non bibetis, domum non ædificabitis, sementem non feretis, vineas non plantabitis. Sed in tabernaculis habitabitis, vt, viuatis diebus multis super faciem terræ. Sic ergo viuunt illi super faciem terræ diebus multis liberi, immunes, & ab ultimo sui excidio tuti semper. Dum delicijs contemptis, nihil fixum expugnationique obnoxium possidentes, tota ipsorum quocunque migrent commitetur eos substantia. Quam ideo fugitiuarij ipsi conditant sibi vniuersam in mobilibus, in mouentibus sese pecoribus ac etiam seruis.

Quamquam verò habeat Precopenfes pecora se penes, copiose pullulantia, seruos autem aliunde captiuos, eo tamē altero facultatum suarū genere plus fortunati sunt. Non habent enim pecora tot, quot mancipia, nam hæc externis quoq; largiuntur prouincijs. Siquidem aduētant eis naues crebrae ex vltiori Ponto, & Asia, portantes arma, vestes, equos, & soluantur ab eis oneratæ semper mancipijs. Quoniam omnia illorum emporia ac telonea, celebra sunt solo eo mercium genere, quod etiam ad manus est eis semper, & mercatui, & pignori & dono, ac unusquisque eorum equi saltem ascensor, etiam cum nullum actu habeat mancipium, potentia tamen, certo semper copiam peculij eius habere se præsumens, promittit in contractibus creditori cui libet numeraturum se ad certum diem pro vestibus, armis, & equis viuacioribus, viuaces etiam, verum non equos, sed homines, eosque sanguinis nostri. Et statur huiusmodi pro-

*Mercimonia mancipiorum.*

*missis*

missis eorum securè, perinde ac si in viuarijs, & cortibus suis reclusos semper habeant illi homines nostros. Vnde Iudæus quidam ibi in Taurica ad portam eius, vnicam illam, teloneo præsidens & innumeram semper hominum nostrorum captiuorum multitudinem importari illuc cernens, quærebat ex nobis vtrum adhuc homines in regionibus nostris superint, nec ne, & vnde hic tantæ mortalium copiae. Est autem id ipsum facultatum genus latronculis illis in promptu semper, nedum in commercium quodlibet ad externos, sed domeriam, & sæuitiæ eorum perferendæ & ludicris.

Crebri enim ibi ex miseris ipsis viri robustiores, si non castrantur, auribus tamen & naribus mutilantur, genis & frontibus cauteriantur, pedicisq; & neruis compediti angariantur, interdum laboribus, noctu carceribus, prærenuique fouentur cibo morticinae, eiusque putridæ, vermibus scaturientis, canibus etiam abhorrendæ carnis.

Fœminæ verò teneriores in lasciujs habentur, & quædā conuiujs etiam adhibitantur hilarandis, psaltui, fidicinatui, gesticulatuiq; artificiosè edoctæ. Quæ liberali forma ex nobiliore gētis nostræ sanguine rapte, adductantur Thalasio & paradysicolæ illi.

Itē & alia spectanda aguntur ibi cum eo hominū genere. Quando videlicet venum producuntur, miserabiles ipsi, in frequentius ducuntur forum, seriatim, velut grues in auolaru digesti & decimatim collis concatenati, venundanturque decadibus integris sub manu & voce licitatoris, qui auctionando, enunciat vociferans, noua esse mancipia ipsa, rudia, non callida, recens capta, ex populo regio, non Moscouitico. Nam Moschorum genus, ut dolosum & fallax, ita vile habetur illic in mancipijs. Taxatur autem sagacius hoc mercimonij genus in Taurica, careque emirur per mercatores externos, venundandum ab eis pluris, vltioribus, arrioribusque, Sarracenis, Persis, Indis, Arabibus, Syris, & Assyrijs. Quilibet namque illorum, auide appetunt captiuas hinc in coniugia, citra tamen vim tunc & iniuriam, sed iuxta normam perscriptam desuper à Domino Deuter. 21. Quoniam & imperatori Turcarum moderno, vxor apud eum gratiosior primogeniti eius post eum

*Captiuorum conditio.*

*Fœminæ.*

*Solymani vxor mater Amurasis 3.*



imperaturi genitrix rapta est ex provincia nostra. Atque Precopenſis Sapkirei, procreatus ex Chriſtiana, & in coniugio habet nunc Chriſtianam. Et omnes tyrannorum illorum miniſtri, ſpadones, ſcribæ, cæteriſque artiſices, & milites præcipui Ianiczari, qui jam inde à pueritia arte & diſciplina militari inſtruntur, & ex quibus tandem Duces leguntur & Barones, de noſtro Chriſtiano ſanguine ſunt. Et proinde quando emuntur ibi mancipia, inſpectantur tunc eorum, ne dum promptiora membra, atque dentes, ne rari ſint neu decolores, verùm additiores etiam perſcrutantur corporis partes. Et ubi quis deprehenditur nævus, tuber, cicatrix vel aliud latens vitium ſeu defectus, ſequitur tum redhibitiſſio. Atque in tanto etiam indagatu ementium, adſtrunt nihilominus eis impoſturam, ſiſtendo illecebras vaſtri proxenetae & mangones. Quos enim habitiores in gregibus captiuorum nanciſcuntur, puſiones, & puellas, non eos vulgo producunt, ſed lautius ad inducendam ſaginam curatos, redimitos ſerico, ſucatos pigmentis, purpurifſo ſtibioſque, ad alliciendum quò pluriſ emantur. Nam interdum ibi penſitantur auro & ponderibus ſuis, emuntur formoſiores, & illibatæ ſanguinis noſtri puellæ. Atque illico etiam ubi emuntur, reuenduntur identidem mancipia formoſa, accuratius mangoniſata aucto precio aut uſura momenti vilius lucri facta. Aguntur hæc & in cæteris peninſulæ illius urbibus, in Caſſa verò præcipuè. Contigitque ibi quod globi miſerorum illorum coemptorum aguntur ex mercatu ad naues reſtæ. Eſt enim contingens portum freti oportuniorem, ſitu ſuo inſatiabilis illa & nefanda, nò vrbs ſed vorago ſanguinis noſtri. Vbi igitur migratores illi ad conſcanſum nauium in littore conſiſtentes viderent do-

*Captiui ad  
Lisimachos o-*

lori eſſe, vicem ſuam nobis inſpectantibus: Vnuſtuc eorum notus & conterraneus mihi velut interpellatus, contraſtione vultu noſtro, reſpondens pro comitina & me intuens, Non eſt iam inquit frater dilecte, quod dolearis extorribus nobis peregrinantibus ita: quamvis enim acerbū hoc & triſte carparamus iter, relictō dolci patrio ſolo, migrantes eò, vnde nunquam redituri ſumus: & quam-

& quamvis quanto longius à finibus patriæ abducimur, tanto maiori in dies natiui ſoli ſtagremus deſiderio: æquiori tamen iam ſors ea ineuitata ferenda eſt nobis animo. quandoquidem non ſoli & non pauci ſimul gregales comitesſque ſumus, & cū haud optatiore ſtatu, cæteros remanere hic in Taurica videamus, conſortes noſtros, ſtigmaticos iſtos, notis compunctos, oris etiam deformatos ſpecie; atque domi non lætiorē iridem experti ſumus uſu veniſſe exitum, neceſſariis noſtris, quos vidimus illic, obrucidari, detruncari, auulſaſque eorum à corporibus membra & capita, iactari, corda quoque in ignem ſpargi trementia, & pulmones exectæ, dum exenteratis aluis illorum, repidiſque ex inſteſtinis, raptaret hoſtis truculētus extra haruſpicis, felles & bi-  
*Haruſpiciæ*  
les vnguētis. Quanquam autem & nobis præſtitiffet multo, ſi illa ac etiam alia quantumcunque crudeliora, vnà & ſemel perpeſſi occubiſſemus apud lares manesſque pater nos, à cultu religionis & à ſepulchris maiorum non abſtracti, corporibusque noſtris felicioribus multo quàm nunc, etiamſi trunca iam & euſce-rata diſcerpra fuiſſent & deuorata illic à beſtijs: ſed quia inuidet nobis illud, prolixioribus hiſ reſeruans nos ludibris fatum inſolens, cui parendum eſt, & iniuſſu eius non ſecedendum, iam minimè in rem noſtram & anxietas hæc, & commiſeratio veſtra, quin potiùs nobiſmet ipſis cauendum eſt, ne idem quoque vos maneat exitus, ne ſcilicet aſportatrices has conſcendatis etiam aliquando naues, & ne tota denique gens noſtra, diſpereuntibus ita crebrius indies alumnis ſuis intercidat. Id quod ſummopere ſanè metuendum eſt, ſi eiſdem quibus nunc eſtis, perſeueraueritis diutius eſſe moribus veſtris pernicioſiſſimis, trahentibus vos iugiter in exitum. Si itaque eſt tibi quicquam aut charitatis in patriam, aut fidei in Principem, aut ſaltem in Deum religionis: tuum quoque debet eſſe, eam periculi imminentiam, vt nunc perſpectis hic hominum conditionibus deprehendiſti, deregere Principi, & quorum denique intereſt, quod vt ſedulò facias, ſi non aliud, at religionis ſaltem ipſius Dei moveat te amor, per quem adiurando te miſeri nos affectum patriæ & libertatis nunc tandem expertes obteſtamur vt ſaltem hoc vltimum à nobis pignus amoris deſiderata haberet patria. Hæc ille perloquens, & graue



suspirans, tractus est in nauem, conscendente decade sua, catenata solida, & subducta in altum classe disparuit, relicto sic nobis elogio.

*Finis Fragminis primi.*

### Quidam ad Lectorem.

*In sequentibus hunc tomis, nihil aliud Michalo, quàm de corruptis gentis sue moribus, quibus nullus sit perniciosior, primoq; repellendus hostis, queritur, quos emendatos esse & optat & regenerationes emendandi ostendit. Verùm nos omisiss eiusmodi querelis, qua de nulla non alia etiam gente esse possint, ea saltem qua ad magistratam vitæ historiam pertinent, cognoscamus.*



### EPITOME FRAGMINIS secundi.



Os ei & Tartari, longè sunt Lituanis inferiores viribus: sed superiores industria, frugalitate, temperantia, fortitudine, cæterisque virtutibus, quibus regna firma consistunt, afferunt Tartaris hæ virtutes ista commoda ut gaudeant copia peculij nostri abacti, & statu temporum sic exigente, placentur annuis muneribus à S. Maiestate vestra, amici scilicet foederati, cum quibus antea quoque semper fuerunt Lituanis fœdera. Idem in equitatu sunt assidui, absque curribus bella gerunt, equis peregrinis abundant, urbibus quas tumentur carent. Mosci quolibet vere ex Orda Tartarica Nohaiensi, permutatione vestium, & rerum aliarum vilium, multa millia equorum bello aptissimorum accipiunt. Turcæ Thraces immittunt nobis magno pretio equos parrus ultimi, senes, laboribus exhaustos, morbis occultis obnoxios: valen-

valentes verò, aut ipsa arma vendere Christianis, religio ipsis est ac scelus. at maiores nostri contenti erant domi suæ natis cantherijs: parati semper ad bellum cum lanceis, clypeis, loriceis & refertis farre culeis. Heroidæ Lituanicæ vel templum vel conuiuium accessaræ, senis vel ostenis eiusdem coloris pilentis, id est, rhedis pensilibus vehuntur: totidemque homines loriceis vincetos Scythia trahens, e iadit impunè at Tartari equorum ditissimi, ne Principis quidem suæ vehiculo iungi patiuntur equum. Turcæ aliq; Saraceni accessuri die quolibet quinquies in fanum ad orandum, excalceant se lauantq; frigida, etiam pudenda membra. iidem atque Tartari, Moscouicæ, Liuones, Pruteni, consules parimonie iugiter retinent vniufmodi vestitus, quos nos & pretiosos & varios habemus.

Tartari tunicas habent absque plicis & rugis longas, equitanti dimicantiq; commodas, leues & pileos albos acutos non ad fastum paratos, quorum eminentia atque nitore in agminibus, licet minimè galeati esse soleant, apparent illustriores, & hostibus formidandi. quas rechnas Mosci quoque imitantur. hi verò ex ouili lana fiunt, & sæpè abluti diu durant, uno emti grosso.

Etsi Mosci soli, Sobolis aliarumq; ferarum genere abundant: tamen vulgò Sobolos pretiosos non ferunt. Sed missos in Lituaniam, molles mollibus, aurum pro eis auferunt: gestantque in lacinijs galerorum suorum cilicinorum laminas aureas, &

gemmas pretiosas. quibus nec humor, nec  
sol, nec tineæ, vt Sobolis,  
nocet.

*Finis Fragminis secundi.*







EPITOME FRAGMINIS  
libri tertij.



ROMA<sup>TI</sup>S aded abstinēt, vt & in epulis pascha-  
libus contenti sint his condimentis, sale lutu-  
lento, synapi, allio, cæpis, suæque telluris fructi-  
bus, non solum vulgus, verum etiam optimates,  
& summus dux illorum, arcium nostratum ere-  
ptor, quasiam 73. enumerat iactanter.

In mensa Principis conuiuali, inter aurea vasa & vernaculas  
dapes, non nihil quidem piperis, non tamen costi in trullis seor-  
sum apponitur, sed à nemine attingitur. at Litvani opiparis &  
exoticis vescuntur cibis, vinum varij generis bibunt, vnde morbi  
varij. cæterum Mosci, Tartari & Turcæ, licet regionum vinife-  
rarum possessores, tamen vinum non bibūt, sed Christianis ven-  
ditum, nervos belli pro eo comparant. persuasi se Deo præstare  
obsequium, si quouis modo extinguāt sanguinem Christianum.

*Aqua ama-*  
*ra*

Tartari, Precopenſes itidem aromata auersantur, viuuntque  
potu lactis & aquæ putealis, quæ in ambitu Tauricæ campeſtri,  
raro inuenitur non amara, clara autem rarius, nisi in visceribus  
terræ, profundissimè quæſita. Progenitores nostri cibos potusq;  
peregrinos vitabant. Sobrii & frugales, omnem suam gloriam in  
re militari, voluptatem in armis, equis, famulis numerosis, &  
qualibus Mars gaudet, duris strenuisque ponebant. & cum exte-  
ras gentes arcerent, sua à mari vno ad alterum prolatarent, vo-  
cabantur ab hostibus Chorobra Litvva, i. ferox Lituania. Nul-  
lum est in oppidis Lituanicis opificium aded frequens, vt co-  
quendæ ex filigine cereuisiæ, & aquæ ardentis. Sequuntur hæ  
poriones in bellum euntes, & ad sacrificia Missalia confluentes,  
quibus homines domi assueti, simulatque insolitum sibi aquæ  
porum in militia attingunt, torminibus & dysenteria pereunt.  
Rustici omiſſa agricolatione, in cauponas conueniunt. Vbi dies  
& no-

& noctes pergreçantur, vris etiam arte cicuratis, vt potantes suâ  
delectent ad cantum vtricularij saltatione. Vnde fit vt facultati-  
bus consumtis, fames sequatur homines, ad furta & latrocinia  
convertantur, aded vt in vnaquaque Lituanica regione, intra v-  
num mensem, plures propter hæc facinora capite pleſtantur,  
quàm centum & ducentis annis per omnes Tartarorum & Mo-  
schorum ebrietatem vetantium prouincias. Certè apud Tartaros, *Pana vini-*  
qui modò vinum gustauerit, is & octoginta fustuarijs ictibus *poterum.*  
percutitur, & totidem nummis multatur. In Moscouia verò nul-  
quam est taberna poratoria. quòd si apud aliquem patremfami-  
liæ vel gurta syceræ deprehendatur: huius tota domus dirui-  
tur, fortunæ confiscantur, familia atque vicini eiusdem vicus va-  
pulant: ipsemet verò in perpetuum carcerem detruditur. In vi-  
ciniam ided sæuitur, quòd sit eo infecta contagio, & nefandi con-  
ſcia criminis. Nostros verò, non quidem magistratus, sed ipsa in-  
temperies perdit potatores, aut mutua arma inter porandum e-  
nata, dies ab aquæ ardentis potu inchoatur. vinū vinū adhuc in la-  
ctis clamitantes. bibitur deinde idem virus à viris, foeminis, iu-  
uenibus in plateis, foris, secus vias, quo infecti nihil post agere  
possunt, quàm dormire, ac qui huic malo semel assueſcit, in eo cre-  
ſcit potandi continenter cupiditas. Nec Judæi nec Saraceni  
quenquam è suo populo patiuntur perire egestate, tanta inter il-  
los charitas viget: nec quisquam Saracenus cibarii sui edere vl-  
lum frustum audet, nisi id prius comminutum & commistum  
fuerit, vt vnicuique præſentium cibus cedat eadem quantitate.

*Bibacis*  
*Lituanorū.*

Abstinentibus autem ebrietate Moscis, oppida illorum cele-  
bria sunt varijs & alsiduis artificibus, qui mittendo nobis crate-  
res ligneos, & baculos ad fulciendum gradum infirmis, senibus  
ebriis, ephippia, frameas, phaleras & diuerſa arma, auro nos spo-  
liant.

Antea Moscouitæ in eiusmodi seruitute Tartarorum Zauol-  
hensium fuerunt, vt dux illorum inter cætera seruitia vnicuique  
Cæſaris legato, & census exactori quorannis in Moscouiam ve-  
nienti, prodiret obuiam extra oppidum. & tenens manu sua e-  
qui eius habenas, pedes equitem ad regiam deducebat. Seden-  
que legato in folio Ducali, ipse genibus flexis legationem au-

*Seruitus*  
*Moscorum.*



Moscos Li-  
tuanus mul-  
ta admittit.

diebat. Ideò & hodie Zauoienses & ab his orti Precopenses ducem Moscorum appellant suum cholop, i. rusticum. Sed præter causam. Nam se suosque ab hac tyrannide Iohannes auus huius Iohannis Basilii, qui hodie rerum gubernacula tenet, redacto populo ad sobrietatem cauponisque ubique interdictis vindicauit. quin subiectis sibi Rezani, Tvver, Sufdal, Volodovv alijsq; finitimis Comitatibus ditionem suam protulit. idem etiam, Casimiro rege Poloniæ & Duce Lituanie in Prussia contra Cruciferos pro regni finibus pugnante, populoque nostro in luxum prolapsò, ademit suoque adiunxit patrimonio Lituanicas provincias Nouohrod, Pskovv, Sievvier, & alia, heroum sanctorum catalogo à suis adscriptus, liberator & auctor patriæ. nam & metropolim suam, arcem lateritia, & regiam lapidibus arte Phidiaca sculpsit, inauratis quibusdam eius sacellorum cacuminibus decorauit. Sic & genitus ab eo Basilii eadem usus sobrietate atque disciplina morum, anni millesimi quingentesimi decimiquartæ vltima Iulii adentem nobis perfidia Michaelis Hlinscij arcem & provinciam Smolensco, addidit suo patrimonio. Vnde Moscovvam metropolim suam auxit, condito in ea vico Nalevvki, opera mercenariorum nostrorum militum indito ei in opprobrium gentis nostræ ebriosæ cognomine. Naley enim Infunde significat. Similiter huius natus qui nunc regnat, et si arcem vnam ad nos affinis: tamen interea intra regionis nostræ fines tres arces condidit, Sebesz, Velisz, Zavylocz. nulla re cedit Tartaris, quorum olim seruus fuit, ita suos habet sobrios: tuereturque libertatem non panno molli, nec auro splendido, sed ferro: tenetq; gentes suas in armis, munit arces perpetuis præfidijs, pacem precariam non curat, vim vi repellit, continentiam Tartaricam continentia populi sui, sobrietatem sobrietate æquat, artem arte Vitoudum heroem nostrum imitatus elidit.

EPI-



## EPITOME FRAGMINIS

### Quarti.



IVSTICIA quoque præstant nobis Tartari. nam reddant unicuique statim quod ipsius est. apud nos verò capit Iudex decimam partem rei iudicatæ, ab actore innocente, quæ iudicis merces appellatur Peressud. quæ ilico in tribunali solvenda est. Cum autem de minima fundi agitur particula, non decima datur, sed licet non fuerit tanti pretij res iudicata, centum grossi; quorum vnus duos cruciatos nummos Germanicos valet, cum dimidia cruciati parte. maioris verò decimam capit semper, summæ bonorum totius, quantacunque deducta fuerit in litem.

Ratio iudiciorum Lituanicorum.

Ex iniuriarum autem personalium & violentiarum vtcunque infimularum casus, capit à reo ratione multæ, tantum quantum adiudicat actori. adiudicat autem propter tanta sua lucra actori, apertè etiam calumnianti fauens, pro offensione eius qualicunque, mari sexagenas grossorum vicenas, foeminae quadragenas, pro damnis verò realibus quicquid calumniator peierans attulerit, centenæ & millenæ, etiam si ne vnam quidem sexagenam valere appareat tota eius substantia. Et pro homicidio, non iuxta legem diuinam ut sanguis sanguine vindicetur, sententia fertur, sed pecuniaria fit, cum decimis magistratus. Quocirca frequentia hæc committuntur parricidia. Et licet actor ingenuus in causis iniuriarum victoria potitur, placetur à reo mollibus verbis: at non iudex. is enim semper pecunias haurit, ab hoc mulctas, ab illo detinuitas.



Capit & decimas à pragmaticis sanctionibus & transactionibus. In criminalibus verò causis, non decimam sed totum capit, quicquid furtivum aut latroni ademptum deprehenditur penes aliquem, qui eius proventus appellatur Litze. Quando autem res ipsa furtiva penes furem seu evictorem eius, portanda est ad alium iudicem: valorem eius integrum capit prior iudex, ita ut necessum sit apud nos repetenti rem suam surreptam, impendere in magistratus plusquam res ipsa valeat: quapropter multi id cernentes sua iumenta furtim abacta, aut utrepta, non audent litem propter ea intentare. Fur etiam in recenti crimine captus, non à magistratu loci illius in quo deliquit aut captus est iudicatur, sed per multa viarum discrimina, ducitur iudicandus, ad suum dominum, interdum ad talem in cuius domum furta inferebat. quamobrem securè furta committuntur. At apud vicinos nostros Tartaros & Moscos, iurisdictio in omnes baronum & nobilium subditos, tam in civilibus quam criminalibus causis, non privato cuiquam, sed publico ordinarioque competit magistratui, eidemque sobrio, & simul cum aliis habitanti. nostri autem & singuli seorsim, & bibentes id agunt, remotis arbitris & testibus, ubi quidvis patrare licet. Capit etiam praeses apud nos praeter scelus, 12. grossos à iumento, quod quis rapit, & appellans erraticum, trahit illud ad stabulum curiae. Sic & ab homine etiam immeritò in carcerem detruso, totidem exigit grossos, praetendens ea stipendia iure sibi, & carceris & stabuli ratione deberi. Famulus quoque iudicis executor sententiae, capit decimam rei iudicatae partem. quin etiam citra iudicarium strepitum, accipit decimam debiti crediti, seu depositi, quantumcunque liquidi, etiam si minimè eat inficias. Et Notarius decimam pene pro litteris diffinitivis, ac pro qualibet opera sua exigit aliquid: pro solo citationis sigillo ad causam unius grossi, quatuor. & quò carius omnia vendantur, necesse est citationem geminam, eamque sigillatam & manu protonotarii subscriptam esse, quod interdum antequam sit, notario in aliis occupato, elabatur non citatus reus, ut eorum natura est fugere. Capit item alius iudicis apparitor Wisz, diem

diem reo dicturum, in causa vel minima, siquidem Palatini fuerit, grossos quinquaginta, si vicarii eius, 30. si regius, vel se eum simulat, centum. Capit tantundem alter, id est, 100. vel 50. vel minimum 30. isque Deczki dicitur, qui reum accersit & ad causam cum citatione ducit. item satelles tantundem rapit, qui à contestata lite, ad testes sistendum examinandumue, aut ad agrum pratumue ab aliena pecude proculcatum aut depastum, seu ad aliud minus damnum videndum delegatur. Si pauper tantam pecuniam non habuerit, iumentis spoliatur. Iniquum & hoc, quod pauper aliquem è magnatibus citaturus, non invenit tum vel maximo praemio apparitorem. Nec hoc minus iniquum, quòd vicinus meus potentior eiusdem mecum pagi haeres, alterius sit fori: nec tam facile ut ego, citatur. Et quòd appellationis remedium sublatum sit nobis, enormi poena apposta, ut est in stat. Lit. dist. 6. art. 1. Prohibita etiam contra potentes Vadia, quae tenuibus sunt arma & quasi scuta ad protegendum. Ad hoc quicunque in testimonium nominantur, quibuscunque in causis, praeterquam in limitariis, iniurati fidem plenè faciunt, solo quaestu falso testificandi viventes. Librum publicum ad referendas in eum venditiones & alia praeter priuatas schedas, non habemus. Reus, etiam si manifestus fuerit rerum alienarum raptor atque violator, non tamen ante ad iudicium accersitur, quam post menstruum à citatione spatium. Adhuc dum iumentum quod 50. vel 100. grossis valeat, mihi eripitur, summa agriculturae opportunitate, ego rapto rem citare in iudicium nequeo, donec prius citaturo eum satelliti solvero id integrum quod raptum valet, cum deinceps non solum solutio expensarum me non sequatur sed nec reum de re ablata in iudicium trahere, nisi post menstrua quaedam intervalla liceat. Itaque iniuria affectus aut totum raptori permittit, aut vi vel fraude par refert.

Tempore promulgationis legum Lituanicarum bos valebat 50. grossis, vacca triginta. quae pretia nunc magis creuerunt. At in alijs regis Poloniae ditionibus, nec tantae induciae patent reo, Forum Polonicum. nec sumptus tanti ad citandum requiruntur. Sed apparitor conducitur ad citandum reum dimidio grossi. & diploma regium, quo quis citatur, absque chirographis protonotariorum valet.



nec adeo magno venit pretio, imò gratis dari iubetur edicto regis Sigismundi in Stat. Polonicis Piotrkouiensibus anno Domini 1511. & iudex à re iudicata etiam maxima non decima parte illius, sed duobus vel ad summum quatuor contentus sit grossis nostris minoribus, qui valent 8. cruciatis Germanicos. apud nos decimarum rei iudicatae ter geminarum causa, iudex suae causae sit iudex: & velut hamo escam habente captus, trahitur semper ad condemnandum, obscuris etiam partium iuribus. Etiam Ethnicorum leges prohibent mercedem iustitiae. quae ad nos immigrauit ante pauca lustra, ex ambigua consuetudine, opera procerum primorum, leges vñ. suis accommodantium, quibus vigentibus nemini licet possidere quidquam quod non obnoxium sit magistratui. verbi gratia: Cum aliquis aut mihi insensus, aut iudici fauens, commodumque procurans, pecuniam meam rapit, seu mutuum depositumue creditum retinet, aut fundum occupat metum: ego nihil horum recuperare possum ab eo, donec prius dederò iudici & familiaribus eius decimas, & alios proventus amplios, in quos totam pecuniam meam breui abire necessum est, si iterum semel vel bis idipsum negotii probus ille iudicis amicus mihi palam facessuerit. vbi verò furto, aut vi palliata, iudicis emissarius aurum, argentum aliaue mea furripit, hæc deprehensa transeunt ad præsidem. Ecce iusticiam Serenissime Princeps in patrimonio tuo, reddentem unicuique quod suum est, en intra sancta.

*Iudices tantum duo.*

Tamet si verò duo ex optimatum numero Palatini in omni Lituania fungantur iudicum munere, locis non admodum disiuncti inter se, verum hi qui sufficere possunt, ut tam numerosi populi & tantarum prouinciarum lites diiudicent? præsertim cum iisdem curæ sit respub. ut vocentur voiuodæ; id est, belli duces. quo fit ut occupati multitudo & publicorum & priuatorum negotiorum, diebus festis, nempe cum sunt liberiores à negotijs, de litibus cognoscant. Sed id etiam mali accidit, quod non habeant certis locis tribunalia. Sæpe sunt 50. amplius milliaria querendi iustitiæ consequendæ causa, ab affecto iniuria. eunt miseri homines à finibus Samagitiæ & Livoniæ, vsque ad terminos Masoniæ & Moscoviæ, persequentes iudicem

iudicem ordinarium. Ad hoc habemus quotannis 40. dies recolendæ dominicæ passioni, ieiunio, orationique dicatos, quos litibus attentius prosequendis transigimus. Habent ij Voiuodæ suos vicarios, qui itidem curato bene corpore, pro tribunali sedere inter conuiuiorum strepitus solent parum gnari iurisprudentiæ, sed in suo Peressud emulando accurati. at Moscovitæ glorientur se à nobis leges sumpsisse Vitovdianas, quas nos iam contempsimus, à Tartaris verò arma, vestes, & rationem bellandi absque curribus, exoticis cibariis & porcionibus.



## EPITOME FRAGMINIS

### Quinti.



OSCOVITÆ irati imprecantur alicui suorum, ut fiat Romanæ siue Polonicæ religionis. adeo eam exolam habent. Gymnasia literariis, dolendum, caremus. literas Moscoviticas nihil antiquitatis cõplectentes, nullam ad virtutem efficaciam habentes ediscimus, cum idioma Ruthenum alienum sit à nobis Lituanis, hoc est, Italianis, Italico sanguine oriundis.

*Lituanis ab Italia ortis.*

Quod ita esse liquet ex sermone nostro semilatio, & ex ritibus Romanorum verustis, qui non ita pridem desiere apud nos, videlicet excrematis humanis cadaueribus, auguriis, auspicijs, alijsque superstitionibus, adhuc in quibusdam locis durantibus maxime cultu Æsculapij, qui sub eadem, qua olim Romanam ab Epidaurò commigrauerat, serpentis specie colitur, & in veneratione habetur. coluntur & sacri penates, mares, lares, lemures, montes, specus, lacus, luci. Sed nec admodum diu facer ille perpetuusque, qui cremandis victimis Romanorum Hebreorumque more fouebatur, extinctus est per baptismatis vndam vgnis, id est, ignis. Etenim & ignis, & vnda, ac, sol, mensis, dies, noctis, ros, aurora, deus, vir, deuir, i.e. leuir, nepotis, neptis, tu, tuus,

*Verba Lituanica.*




meus, suus, levis, tenuis, viuis, iuuenis, vetustus, senis, oculus, auris, nasus, dentes, gentes, sta, sede, verte, inverte, perverte, aratum, occatum, satum, semen, lens, linum, canapum, auena, pecus, ouis, anguis, anfa, corbis, axis, rota, iugum, pondus, culeus, callis, cur, nunc, tractus, intractus, pertractus, extractus, merctus, immerctus, futus, infutus, versus, inuersus, peruersus; primus, vnus, duo, tres, quatuor, quinque, sex, septem, & pleraque alia, idem significant Litvano sermone quod & Latino. Deuenerant vero in hac loca maiores nostri, milites & ciues Romani, missi olim in colonias, ad arcendum à suis finibus gentes Scythicas. seu vt certior fert opinio, sub C. Iulio Cæsare appulsi, Oceani aduersis procellis. Nempe cum is Cæsar, vt scribit Luc. Florus, victis Germanis & in Gallia cæsis, Rhenum proxima parte Germaniæ domita superans, ac deinde Oceanum in Britanniam disiecta tempestatibus classe, parum prosperè nauigaret, delata enim naues maiorum nostrorum ad litus, vbi nunc est arx Samagitiæ Ploteli, creduntur egredi in terram. Quin & nostro tempore perueniunt naues quædam transmarinorum in illud idem litus. Vbi nostri progenitores laborum & periculorum maris pertæsi, & captiuis tam viris quam feminis onusti, cœpere in tabernaculis ad focos, more militari, adhuc in Samagitia durante, vitam degere. vnde vltius progressi, subegerunt vicinos populos Iaczuingos, deinde Roxolanos seu Ruthenos, quibus tum vt Moscis dominabantur Tartari Zauolhenfes: & singulis Ruthenorum arcibus præsidebant ij, qui appellabantur Baskaki, è quibus exacti sunt à parentibus nostris Italici, qui postea Litali, deinde Litvani appellati sunt. Tum innata fortitudine, populis Ruthenicis, regionibus arcibusq; è Tartarica atq; Baskakorum seruitute ereptis, ditionem suam à mari Samagitico, quod Balteum dicitur, ad pontum Euxinum vbi ostia Borysthenis, & ad fines Valachici, alterius Romanorum colonici, & terras Voliniæ, Podolici, Kijouici, Sievvier, atque campestres regiones vsq; ad terminos Taurici, ac Tovvani traiecit Borysthenis, omnia occupando, & illinc aquilonem versus ad vltimam & proximam metropoli Moscouici arcem Mozaisco, ipsa quidem exclusa, sed Wiazmam, Dorohobusz, Biela, Toropetz, Luki, Pskovv, Noui-

horod,

horod, omnibusque citerioribus arcibus & prouincijs inclusis protulerunt. postmodum amplificata sic virtute militari ditione sua, diadema quoque cum nomine regio obtinuerant Principi suo Mindavvgo, sacri baptismatis caractere insignito. Sed extincto illo rege, etiam nomen regum atque Christianum interierat, donec rursus vicina nobis & Christiana gens Polona, ad sacrum baptismum & regale fastigium anno Christi 1386. inuitaret feliciter hic dominantem proavum Sacræ Maiestatis vestræ, diuū Wladislaum, Lituanicè Iagelonem nuncupatum, quod virtus duarum gentium confinium consociata fortior foret in reprimendo communi Christiani nominis hoste. Quam *Iudai.* in regionem confluxit ex alijs prouincijs omnium pessima gens Iudaica, iam per omnia Podolici, Voliniæ & alia fertiliora oppida aucta; perfida, callida, calumniatrix, quæ nostras merces, monetas, Syngrapha, Sigilla adulterat, in omnibus emporiis victum Christianis præripit, nullam artem præter imposturas & calumnias exercet: ex progenie Chaldæorum natio pessima, vt tradunt sacræ literæ, adultera, peccatrix, infidelis, nequam, peruersa.







EPITOME FRAGMINIS  
Sexti.

Sexti LITUA  
MICH.

**R**ESTANT nobis Tartari non solum frugalitate & prudētia, verū etiam dilectione proximi. conseruant enim societatem inter se & beneficentiam. seruorum quoq; iustam habent rationem, quos non nisi alienigenas habent. & licet aut bello aut pretio quæsitos, tamen ultra septennium non retinent. iubente id Scriptura Sacra Exod. 21. at nos nec bello nec pretio acquisitos, nec externos, sed nostræ gentis & religionis, orphanos, egenos, coniugis ancillarum irretitos, tenemus in seruitute perpetua. abutimurq; auctoritate in eos nostra, dum eos cruciamus, mutilamus, necamus absq; iudicio legitimo, ob quamcumq; suspitionem. Contra apud Tartaros & Moscos nulli magistratui licet necare hominē, licet in crimine manifesto, præterquam metropolitanis iudicibus: idq; in metropoli. at apud nos per omnes viros, villas, sententia vulgo fertur in homines. adhæc ex solis saltem subditis nostris oppidanis inquilinis, aratoribus pauperimis, stipendia in defensionē reipub. exigimus, dominis fundorum præteritis. cum tamen ipsi plura percipiant ex suis latifundiis, agricolationibus, pratis, pascuis, hortis, oleribus, pomarijs, syluis, nemoribus, melle, venatione, cauponis, officinis, mercatibus, teloneis, naulis, portorijs, lacubus, fluminibus, stagnis, piscinis, molendinis, pecorum gregibus, seruorum ancillarumq; laboribus, magis autem procederet bellica expeditio & tributum in eam, quod sit viritum, si inchoata fundorum agrorumq; omnium tam nobilium quàm plebeiorum æqualis dimensio absolueretur, qui enim maiores agros haberet, plus contribueret.

EPI-



EPITOME FRAGMINIS  
Septimi.

**A**RTARI suas mulieres in abditis semper tenent locis. nostræ verd circumueunt domos ociosæ, cœtibus virorum se miscendo, vestitu ferè virili. unde nascitur libido. iidem repleturi incolis terram quæ ad inhabitandum creata dicitur, & genus humanum ad laudem Domini propagaturi: præterea cum non omnis mulier fecunda sit, nec quolibet mensis tempore attingenda à viro, neque semper ad concipiendum apta, & concepto semel foetu, non sit interim cognoscenda, quippe cum prolis gratia non libidinis accipiatur vxor, & vnico congressu concipiat foetum interdum non vnicum, vt patet in Thamar & Rebecca: propterea inquam Tartari tantum seminis virilis vigorem considerantes, neue illud præter opportunitatem effundatur cauentes: sequuti ducem naturam, atque laudabilem priscorum hominum, de quibus in Biblijs, consuetudinem, plures simul singuli vxores habent. Ex quibus coniugis vires contra nos maiores acquirunt, numerosas filiorum & affinium copias consequuntur, & vxores, quantò plures, tantò sui amantiores habent, faustisque fruuntur matrimonijs. nec sponсарum magnas dotes quærunt, nec formas nec inclytas familias. adeò vt summi principes ex captiuis emptitijs coniuges sumant.

Polygamia  
Tartarorū.

Cæterum nostri contra morem priscorum, sanctorumq; hominum, & belluarum naturam, honor sit pijs aurib. nonnunquam plures ad vnā accedūt foeminā, nullum hinc nec prolis nec affinitatis, neque vllius amicitiae fructum sperantes, nec Deum verentes, dotes quærunt, formas spectant, quibus sibi foeminę obligant & deuinciant viros. superbiores fiunt, & id studēt vt non tam integræ quàm pecuniosæ & formosæ habeantur, et si

Vxores Li.

D 2



fictis nonnunquam pecuniis, pictis faciebus. id quod latius in populo nostro patere coepit, postquam promulgata est nobis lex Stat. Lit. dist. 4. arti. 7. concedens pro dote mulierib. certas hæreditatum partes. unde insolentes factæ, subinde virtutem negligunt, tutoribus, parentibus, maritis immorigeræ fiunt, & viuentibus immaturam machinantur mortem. hæc multitudo vxorum facit vt vicini nostri Tartari Preco-penses toties à nobis ad interuicemionem cæsi, rursus repul-lulascant. nec ita pridem in copijs Oslam, Soltan fuerunt

40. Fratres.

collethanei eius, cuiusdam Omeidesz 40. filij simul, robusti vno anno & mense fortassis, ex vxoribus & pellicibus earum procreati. quæ cohors 40. fratrum germanorum conspicua fuit. & hic apud fluuium Vaka villa Tartarorum frequens est, antiquitus 40. Tartarorum, id est, fratrum appellata. Mercandiarum sponfarum morem, qui est apud Tartaros, pater fuisse etiam apud Israelitas, Genes. 29. & 1. Reg. 18. quemadmo-dum & in nostra olim gente soluebatur parentibus pro spon-sis pretium, quod Krieno à Samagitis vocatur. Sed nunc man-cipamur dotibus vxorum, & serui propter eas efficimur quæ-rentes magnificas affinitates.


Nec Tartari nec Mosci vllam permittunt mulieribus liber-tatem. Ac vulgò id dicunt: Qui mulieri libertatem concedit, is sibi eam adimit. non sunt sui iuris apud eos. apud nos verò quæ-dam multorum virorum capitibus dominantur, possidentes pagos, vrbes, tractus, aliæ vsu fructuario, aliæ hæreditario iu-re. qua dominatus libidine degunt sub prætextu virginitatis aut viduitatis effrænes, & subditis molestæ, alios odio prose-quentes, alios amore cæco depereuntes, ac extollentes, cum morte amarior dicatur esse mulier, & nihil sit peius ira eius. Ecclesiast. 7. & 25.

Femine ca-pitantes.

Et cum imperium muliebri satis turpe sit, etiam intra pe-netralia privatae domus, tamen apud nos tenentur ab eis ar-ces finitimæ regionibus Moscorum, Tartarorum, Turca-rum, Valachorum, non nisi cordatis credendæ viris. non iniuria igitur progenitores S. Maiestatis V. libertatem licen-tiamque hanc hæreditatum non permittebant mulieribus. sed

cas

eas nuptui tradebant. suo non illarum arbitrio: non opibus, nec genere, sed virtute nobiliorib. viris, qui se nobilitabant profun-dendo in bello & tuo & hostium sanguine. itaque agasionibus etiam, qui se benè in re bellica gesserunt, dabantur hic heroidæ v-xores: vocati quidam Sakones & Sungailones.



### EPITOME FRAGMINIS Oslani.



QVIBVS premijs alij illecti, frequentes etiam ex plebe, fiebant boni milites, quibus fulti progenitores S. Maiestatis V. longè lateq; ditionem proferebant suam, ita vt etiam nunc in media Taurica & Moscouia alijsque pro-uincijs cernantur vestigia maiorum Maiesta-tis vestræ: appellantur enim ibi quidam Ge-diminei ac Vitovvdini valli, colles, putei, pontes, viæ, fossæ, sta-tiua & mœnia tormentis indigerum illorum quassata, alia verò baculis etiam Lituanorum obruta fuisse memorantur. sed tamen non torpore nec otio languebar patricia pubes, exercebatur assiduè in militia more progenitorum suorum Romanorum, non illi dum indiceretur bellum, aut grauem ab hoste iniuriam, aut temporis æstui opportunitatem expectabant: sed vel ob priuata-m, vel non admodum grauem subditis iniuriam factam bella faciebant, Moscorum metropolim Moscvvam nonnunquam circa festum paschatis attingebant, ibidemq; cum hostibus sup-plicibus fœderaiciebant. at nunc princeps ullo- rum ferox nobis est, vt pote qui gentes suas exercet in assidua militia. non licet cuiquam indigenarum domi semper sedere: Verùm alternis vi-cibus, excubandum est foris in præfidijs confiniorum. taxant hanc nostram supinam securitatem, hostes nostri Tartari, vsitato suo sconi-mate cum nos post comestrationes somno sepultos, hi-sce cum verbis inuadunt: Iohannes tu dormis, ego te vinciens,

Virtus anti-  
quorum  
Lituanorum.



labore. plures nunc nostrates ociosi milites in cauponis, mutuis  
cædibus quàm ipsi hostes, qui patriam nostram crebrò populan-  
tur, pereunt, qui exercendo se in campis cum sobriis solertibusq;  
hostibus, in finibus Podoliæ atq; Kriouiæ, haberent copiam de-  
certandi magis gloriosam, & ex tyronibus strenui milites ac du-  
ces euaderent, nec aliunde ad ea munia obeunda quærentur.  
Non contemnebant suos vernas, maiores Maiestatis vestræ, quos  
expedit ac necesse est pugnare fortius, ac mori pro legibus & pa-  
tria. Nec, si patruelis S. Maiestatis vestræ Rex Hungariæ Ludo-  
uicus, suos milites vernaculos peregrinis anterulisset, in expe-  
ditione contemptus, in prælio desertus, in fuga conculcatus fu-  
isset. Expertus est fidem suorum, auus & illius & Maiestatis ve-  
stræ diuus Casimirus, pugnans ad Choinicze in Prussia cum  
Cruciferis, ubi & militis & ducis boni fungens officio, turbata  
suorum acie, & labore & onere armorum lassus, equo saucio lan-  
guente, confestim corporibus militum gentis nostræ circumse-  
ptus, alio consensu, dissectis hostium agminibus periculo præ-  
senti ereptus est. quod Mosci æmulati, nec armis exercet nec pe-  
cunijs dicant milites peregrinos, aliquando è regione excessu-  
ros: sed suos vernaculos iugiter perseveraturos fouent, curæ ha-  
bentes non stipendiorum, sed hæreditatum illorum quantita-  
tes. nunc autem nostri milites ordinarij in confinibus, quamuis  
multò vberioribus & hæreditatum fructibus & laborum, ac re-  
missione consuum, alijsq; militaribus gaudeant prærogatiuis:  
tamen hæc stipendia contemnunt, permissa & armorum exerci-  
tatione & patriæ defensione transfugis Moscouitis atq; Tartar-  
is. pendimus quotannis munera Cæsari Precopenfi: Cùm ta-  
men nostra Litwana & Samagitana pubes ad militiam utilior es-  
set, tam ferocitate naturali, quàm corporum robore, & perseue-  
rantia in præsidijs constantiore. Sed neq; hoc considerant Sum-  
mates nostri, senescere ocio ciuitatem, & corpora iuue-  
num salubriora fieri in militia  
quàm domi.

Ludovicus  
occisus  
1526.

FRAG-

FRAGMEN NONVM.



N Litwania vnus homo decem occupat officia,  
cæteris ab administratione illorum exclusis. at  
Moscos æqualitatem inter suos seruat, non uni-  
plura munia concedit. quin vnus arcis curam eam-  
que annuam, vel ad summum duorum annorum,  
duobus simul præfectis, duobus notarijs committit. quæ res facit  
vt aulici spe obtinendæ præfecturæ alacrius seruiant suo princi-  
pi: & subiecti clementius habeantur à præsidibus, postea ratio-  
nem reddituris, & in iudicium venturis. nam damnato reperun-  
darum, in eundem est cum iniuria affecto. plebeio etiam, duellum.  
& quamuis liceat incusato, alium loco sui ad certandum surro-  
gare: tamen hoc succumbente, accusatus poenas luit. ita fit, ut mi-  
nus crebræ audiantur in regia oppressorum querelæ.

Duella Mo-  
scouitica.

Quin & in re familiari, eniter solertia barbari illius. adeò e-  
nim nihil in ea negligit, vt & paleas, stipulas, stramen vendat.  
proferuntur in conuiujs eius grandes pateræ aureæ & argenteæ,  
stramineæ cognominatæ, id est, è straminum palearumq; pretijs  
constatæ. Habet & id commodi ex frugali præfecturarum dis-  
pensatione, vt quoscunque ad limites terrarum tuendos, ad ne-  
gotia publica, legationes etiam longinquissimas obeundas mit-  
tit, hæc ipsi non vllis sumptibus à principe acceptis, sed suis  
perficiant. Et siquidem omnia ex re ac sententia eius peregerint,  
præmiorum loco non præsentem pecuniam, sed has de quibus  
iam dictum præfecturas, ab eo accipiunt. quarum similes apud  
Romanos quoq; fuisse Lucas in Actis cap. 24. testatur. Expleto  
inquit biennio, accepit successorem Felix Portium Festum.  
Econtra apud nos qui aliquo allegantur, quamuis nondum me-  
riti, tamen abundè accipiunt ex ærario pecunias, licet plerunq;  
rebus infectis, reueniant ijs per quorum possessiones iter habue-  
runt, graues, & equis dispositis quos podvvodas vocamus ex hau-



stis. at in Mosconia nulli pater usus talium equorum, quàm tabel-  
lario publicæ necessitatis causa præproperè currenti, quorum  
veloci cursu, & crebra fessorum mutatione, (nam ubique loco-  
rum sunt eam ad rem pernices & integri,) nunci; perferuntur ci-  
tissimè. In Lituania verò, prodiga est diplomatum dandorum ad  
eiusmodi cursus Cancellaria Maiestatis vestræ Subinde delassan-  
tur Podvvodæ privatis aulicorum rebus vehendis. fitq; tali de-  
fectu Podvvodarum, ut incauti innadamur ab hostibus, aduen-  
tum illarum ab ipsis finibus, præuertentibus. Sunt autem non ita  
pridem ab hoc ministerio exemptis, qui illud fundis ad hoc an-  
tiquitus acceptis, præstare debebant, per omnes vias à regionib.  
Moscorum, Tartarorum & Turcarum ad Vilnam Metropolim  
nostram, quæ illorum priuilegia, abroganda essent, utpote no-  
centia publicæ utilitati. *Transfuga.* Transfugarum Moscorum crebrò ad  
nos venientium, magna iam est multitudo, qui exploratis rebus,  
& pecunia, fortunis, rerum mbrumq; nostrorum cognitione in-  
structi, liberè ad suos reuertuntur; dum hîc sunt consilia nostra,  
clàm suis produnt. at apud Tartaros in mancipiis habentur: ab  
Liuonienfibus verò, licet nullas illorum terras occupauerint  
Mosci, sed perpetuæ pacis viciniratisq; foedere coniuncti ipsi  
sint, tales occiduntur. Porro qui occidit, is ultra spolia cæsi, capit  
à magistratu certam pecuniam, quippe parent Siracidi monenti,  
ne vnquam credas inimico tuo, ne statuas eum iuxta te, ne con-  
uersus stet in loco tuo, quibus consilijs si & nos obsecundasse-  
mus, non arces neq; prouincias Seuerenses amissemus. quibus-  
cum defecerunt à nobis Mozaiski & Ossomacitz. hi enim rece-  
pti inopes, descuerunt locupletes, aucti prouincijs administra-  
tioni suæ creditis: Est namq; hoc hominum genus dolosum, &  
perfidum, nusquam sincera fide vel animo firmo. reuersi in pa-  
triam ducesq; sui facti, vastarunt audacius regiones nostras. In-  
ter perfugas Moscos, qui intempestis noctibus homines Vilnæ  
contrucidabant, & ex carcere suæ gentis captiuos liberabant,  
fuit vnus presbyter qui cancellariæ regiæ clandestinè quæsitæ  
exempla foederum, decretorum, consiliorum, ad suum Ducem  
mittebat. alius Eucharistiam, de quadam virgine inter commu-  
nicandum seruata, causa magicarum præstigiarum emit. & cum

*Transfuga.*

*Mosci mali.*

anno 1529. omnis Vilna deflagraret, confestim hoc istud sagax  
& sceleratum genus hominum, principi suo indicauit. vbi in  
templo cathedrali diui Stanislai, plumbo tacti & fastigijs inau-  
ratis, multisq; vasis aureis, argenteis atque gemmis ornati, con-  
flagrarunt antiqua vexilla, in victorijs acquisita Roxolanorum,  
Moscorum, Alemanorum aliorumq; populorum circiter tre-  
centa, noua 12. quæ ibidem appensa erant, post victoriam de Mo-  
scis ad Orsam 1514. 8. Septembris, natali die Mariæ virginis:  
Cum cæsorum & captiuorum octoginta millia essent. Est enim  
à vasto illo homine transfugæ redeunti etiam inani & inertis  
constitutum præmium, seruo libertas, plebeo nobilitas, debito-  
ri obarato absolutio, scelerato impunitas. Est nobis insignis arx  
& oppidum Kionia. quæ tamen ut aliæ, negligitur, ex cuius pro-  
monitorio multa alia videri loca, vulgatum est Roxolanorum  
proverbium. Princeps aliarum arcium & prouinciarum, ad am-  
nem sita, campestres & syluestres hinc inde attingens regiones,  
habet fundos adeò fertiles, & cultu faciles, ut duobus saltem ara-  
ti bobus idq; semel germinet copiosissimè. inculti etiam her-  
bas proferunt, radicibus & culmis cibantes hominem: & arbo-  
res variorum nobiliumq; fructuum, atque vites. vix minimè a-  
grestis racemorum grandium: labruscæ vitro in ripis quibusdam  
pullulant. Quercus & fagi veteres, vetustate excauatæ, examini-  
bus apum & fauis, coloris & sapore iucundissimis redundant.

*De Kionia.*

Ferarum in syluis & campis tanta copia, ut bisontes, onagri, *Ferarum*  
cerui, tantum pellium gratia mactentur, quorum caro ob nimiam *multitudo.*  
abundantiam omnis abiicitur, præter spinam dorfi pinguioris.  
damæ, apri contemnuntur. Dorcarum ea via migrantium hyeme  
è campis in sylvas, & æstate in campos, ut tunc singuli rustici  
mille occidant. Castores frequentissimi in ripis domicilia ha-  
bent. Avium multitudo miranda, adeò ut pueri verno tempore re-  
pleant scaphas ouis anatum, anserum syluestrium, gruum, cy-  
gnorum, deinde pullis earum referant viuaria. Aquilarum pul-  
los caueis recludunt pennarum causa, sagittis aglutinandarum.

Canes nutriunt carnibus ferinis & piscibus. nam incredibili  
multitudine turionum aliorumq; grandium piscium, ex ma-  
ri sursum in dulces aquas ascendendum, scaturiunt amnes. quo-



*Ingens vis  
piscium.*

rum aliqui aurei appellantur, Præsertim Pripiecz, qui certo quodam loco apud Mozir, ad ostia fluuioli Tur, recenti vnda è fontibus emanante, repletur quotannis ad Kalendas Martias, tanta piscium multitudine, ut hasta inter eos immissa hæreat ac perstet recta, perinde si terræ infixæ foret. tanta est piscium densitas, quod nec ego crederem, nisi sæpe vidissem hauriri illinc pisces absque intermissione, repletiq; eis mercatorum exterorum die vno mille circiter currus, qui ad statum illud & anniuersarium tempus illud conueniunt.

*Borysthenes.* Omnium autem qui ibi sunt fluuiorum, & maximus & fructuosissimus est Borysthenes, immensam copiam non piscium tantum sed aliarum etiam rerum Kiouiaë suppeditans. Cui ab Oriente supra Kiouiam iunguntur amnes Desna, Siem aliq; è prouincia Sevvierienfi & Moscouia. à Septentrione verò, Occidente & Meridie, illabuntur in eum Sos, Beresina, Prypiecz, Slorzesnia, Vssa, Teterovv, Rpievv, aucti singuli fluuijs, Vechra, Propalcz, Iputz, Druz, Bobr, Titvva, Pczir, Slucz, Oressa, Stir, Horinia, Piena. fluunt & alij multi de terris Lituaniaë, Rulsiaë, Voliniaë & Moscouiaë, deorsum atq; sursum, per quæ omnia deuehuntur Kiouiam pisces, carnes, pelles, mel & sal ex lacunis Tauricensibus, Kaczibieiovv appellatis. vbi singulae naves implentur sale emto denis sagittis.

*Tartarorum  
man-gatio.* Est etiam Borysthenes omnibus Maiestatis vestrae prouincijs ad arcendos incursus Tartarorum utilis. Nam & nauigantibus eo, infra Cerkassi obstant quædam limina vndecim locis, certa habentia nomina. hæc ardua & transuersa cautibus asperis eminent. quæ transiri nisi exoneratis nauibus non possunt, & propter excelsas & abruptas riparum rupes non potest accedi nec traijci, nisi quibusdam locis infra Cirkassi, ea appellantur Kerméczik, Vpsk, Hierbedeievvro, Massurin, Koczkosz, Tovvany, Burhun, Tyachinia, Oczakovv. quæ loca vel parua manu nauali obfessa, arcet à transitu maximas Tartarorum copias. Nam cum tranant ut solent absq; nauibus, equis adnixi, & inermes & nudi: profligantur ab ijs qui armati, nauiculis prouult ex insulis, arundinetis atq; salicetis.

Sed ut habent Precopenfes Borysthenem nostrum ætate sibi infestum,

infestum, ita hyeme commodum, quia tunc sublata nauigandi opportunitate, securè greges suos extra fossam in eiusdem amnis insulis & salicetis pascunt. Ideò illum melle & lacte fluere dicunt. quippe qui supra per nemorosos & apiferos, infra per campestres & pascuos means agros, suppediter accolis lactis mellisque copia. propterea ij persuasum habent, colenda sibi esse foedera, & societatem seruandam cum magno duce Lituaniaë Borysthenis Domino. qui amnis torus à summo ad imum fluit, scilicet & oriens & occidens per terras ditionis vetustæ Lituaniaë, iuxta arces à me perlustratas, Viazma, Dorohobusz, Smolensko, Dubrovno, Orsla, Mohilevv, Rohaczovv, Bihovv, Reczicza, Lubecz, Czornobil, Kiovv, Kanievv, Czerkassi & Dasso vv, aliter Oczakovv. Vbi inuoluitur mari duodecim ostiis diuisus. quorum summitas dicitur Linien. Vnde haud procul ostia Dnestri, cognomen habent Vidouo, ab Ouidio poëta, qui ea in parte ponti exulasse creditur. Ita & Ilium seu Troiam quidam existimant fuisse in territorio Kiouienfi in campis fertilissimis, nemoribusq; amœnissimis. Vbi cernuntur monumenta, extantibus adhuc multis ruinis, fornices, cryptis, pavimentis marmoreis, & magnorum murorum reliquijs: qui locus pridem desertus, sed ad habitandum commodissimus, vocatur nunc Torgouitza.

Mercimonijs quoq; exoticis affluit Kiouia. Quidquid enim gemmarum, holoserici, auri filati, bonibycis, thuris, thymiamatis, croci, piperis, aliorumq; aromatum ex Asia, Perside, India, Arabia, Syria fertur in Septentrionem, Moscouiam Plefcouiam, Nouogardiam, Sueciam, Daciam versus, non alia certiore, rectiore, & magis trita via quàm ea quæ à portu ponti Euxini, hoc est, ab vrbe Caffa, per portam Tauricæ, & Tovvani, traiectum Borysthenis, & inde per campos Kiouiam ducens, antiqua & sulcorum suorum profunditate notissima est. Solent enim illac crebro proficisci exteri mercatores plerunq; mille numero, aggregati in cohortes Korouani appellatas, cum multis carpentis onustis & camelis elicellatis, à quibus insigne telonium antiquitus pende batur progenitoribus Sacrae Maiestatis Vestrae, in traiectu Borysthenis ad Touanè vbi etiam hodie extat camera lapidea fornicata integra, quam & nostrates & Tauricani & Græci,

*Arces ad Bo-  
rysthenem.*

*Ouidii exi-  
lium.*

*Iter merca-  
torum O-  
rientalium.*



*Penna scor-*  
*malorum.*

balneum Virōrdinum vocant. aiuntque excubasse ibi publica-  
num Magni Ducis Lituaniae. quī telonium exigebat. quod si  
quis non soluisset, aut scoratus esse deprehensus fuisset, is confi-  
scatis Kiouiae bonis omnibus, multabatur. quae lex Ossimicz-  
tyvo dicta, frænandę salacitatis Saracenicae causa sancita, & mul-  
tis seculis seruata, haud pridem antiquari cœpit.

Quando verò mercatores duplicem Borysthenis traiectum  
fugientes, nec telonium Maiestatis vestrae pendere volentes, o-  
missa via antiqua ducente per ditionem Maiestatis vestrae, à por-  
ta Taurica deorsum digrediuntur, rectà se campis inuis in Mo-  
scouiam ad Putiul cōmitrentes, vel ex hac redeunt, sit vt à qui-  
busuis spoliuntur, etiam à latrunculis ibi oberrantibus.

Tum verò multa lucrantur Kiouienſes Præsides, publicani,  
mercatores, trapezitæ, naucleri, vectores, lixæ, caupones, nec an-  
te hac de hoc querebantur, aut Moscus, aut Turca, aut Tartarus.  
Verum & tum commoda percipiuntur ex his Korouanis, cūm  
interdum brumali tempore iter habentes per campos inuium,  
aggeribus omnes obruuntur atq; suffocantur.

Ita cōtingit vt ruguria Kiouienſia, alioquin satis superque fru-  
gibus, fructibus, melle, abundantia & carnibus piscibusq; lorden-  
tia redundent pretiosis fericis, gemmis, zolis alijsq; pellibus,  
aromatibus, adeò vt viderim ibi sericum quam vilnæ linum, &  
piper sale vilius esse. Est etiam foelix & celebris Kiouia homi-  
num affluentia, nam ad Borysthenem, & alios in eum influentes  
amnes, multa sunt oppida populosa, plures villæ, quarum inco-  
læ iam inde à puero assuescunt natare, nauigare, piscari, venari;  
quorum alij vel patriam potestatem, vel seruitutem vel laborem,  
aut poenas vel æa alienum ceteraue fugientes: alij lucri vberio-  
ris, lociq; celebrioris gratia, præsertim verno tempore, in eam  
appellunt. Cuius arciumq; infra eam sitarum experiri delicias,  
nunquam deinceps ad suos redeunt: ac breui tempore red dun-  
tur exercitiores, cominus vsos, bifontesque feriendo, quibus  
vitæ periculis affueti, sunt animosiores. proinde facilius ibi ha-  
betur copia bonorum militum.

*Volodimi-*  
*rus Mosco-*  
*vum dux.*

Eadem fuit Rusiæ Moscouiæq; ducum regia: in qua itidem  
Christiani facti sunt, quæ nunc quoque Basilicas habet verustas  
è mag-

è marmore poplito, & alijs exoticis materijs, sumptuosè ædifica-  
tas, plumbeis, æneis, quibusdā etiā inauratis laminis testas. Sunt  
& monasteria opulentissima, maximè quod Beatæ Virgini Ma-  
riæ consecratum est. id in suis cryptis & cuniculis subterraneis  
habet multa sepulchra, in quibus sunt cadauera integra & arida:  
quæ cum sanctorum esse credantur, magna veneratione à Ruthe-  
nis coluntur. nam quæ ibi corpora sepeliuntur, eorum ab hoc a-  
nimæ saluæ futuræ creduntur. propterea omni præstantiori ex  
longinquis quoq; locis nobilitati, & sumptibus & eleemosy-  
nis magnis, sepulturæ ibi quærentur. Seruat & Moscorum dux  
non paruum pecuniam, quam ex fundis eiusdem monasterij in  
suam potestatem redactis, singulis annis colligit. Sed reddere id-  
eo differt, quod hanc sedem, quæ ipsi cordi est, magnopere ex-  
perit, stirpem se esse Volodimiri hæredis Kiouiae dictitans. non  
minus dolent illius homines, quod non possideant tam anti-  
quam stemmatum sanctuariorumq; suorum cathedram.

Tot vrbis commoda, habent etiam sua incommoda. nam in-  
colæ eius haud tuti sunt à Tartaris, ex infidijs terminos eius at-  
tingentibus, tamen non tentant vi expugnationem illius. Est &  
aduenis periculum à febribus ex diurno somno, & piscibus atq;  
fructibus auidius sumtis, prouenientibus: equis autem eorum ex  
graminibus eluue pisculenti Borysthenis insectis. Segeres quo-  
que sæpe corrumpuntur à locustis, ex maritimis locis venien-  
tibus. Nascuntur ibidem ad aquas & in syluis, vt apum ita alio-  
rum examina insectorum, sanguini infestorum, vt bru-  
chorum, culicum, muscarum, potissimè  
à Kalendis Iulij.

*ſi Christiani*  
*nus cum*  
*ſuis Anno*  
*988.*

*Superſitie.*

*Lucula.*







EPITOME FRAGMINIS  
Decimi.

**R**ELIGIO seu lex est communis Tartaris cum Turcis atque alijs Saracenis, quæ Iudaismum olet, & hæresim quandam Nestorianam. Deum vnicum & simplicem proficitur. Christum verò, sanctum Prophetam & iudicem mundi postremum, Virgine pura natum, sed non passum credit. Circumcisionem obsequatur. Sed eam tam adulta ætate suscipit, qua Ismahel patriarcha illorum circumcissus erat. Orta autem hæc secta proditur in Mecha oppido Arabiæ, Anno salutis humanæ pene sexingentesimo, suggerentibus eam Iudæis, ibi post eversam Ierusalem degentibus, machinatione cuiusdam Sergii monachi & apostatæ nefandi, in perniciem Christianitatis. Ea edita per quendam Arabem idiotam, ingenii callidissimi, qui ex auriga vitæ & dominus vxoris suæ diuitis factus, ad principatum etiam inter suos aspirauit. quo conatu frustratus, se nuntium & prophetam Dei finxit, & idolatris Arabibus persuasit. Hæc lex quæ armis proferendam sibi esse existimant, adeo fabulosa est, ut finem bonorum & summam voluptatem statuatur in voluptatibus, quibus scilicet beati gustu, tactu cæteribusque sensibus exterioribus, in futuro seculo explendi sint. Et tamen barbari in tali errore pecuino iactant se Dei proximi que amore, & operibus, quibus placatur Diuina Maiestas, nos excellere. eamque ob rem propitium sibi esse Deum pollicentur, suarumque rerum statum, ut est hominum vanitas, augustiorem indies facturum sperant.

Nos autem Christianos ob magnam rerum diuinarum negligentiam, & quas alijs alium afficit iniurias, iniquitates, vituperant, rident, barbaros, exleges, nomen saltem Christi gerentes, non

Mahomes  
legem fert  
anno 621.

non legem eius præstantes, conuiuijs incessunt, & sua indignos communionem reputant. Iustitiam sanctè colunt. Religionem suam assiduo conatu propagant. Diem à precatione auspiciantur, & precibus finiunt. quotidie mane, vespere, & pomeridianis horis orant: nulla, quo id minus agant, necessitate auocari se sinunt. non id opus in solos sacerdotes reijciunt: etsi illos saltem à precatione & lege interpretanda habent. quilibet pro se tam clericus quam laicus pariter, & clam & coram hominibus turmatim in coetibus Deum confitentur. Semper sobrii, aqua lustrali membra loci, terram in qua cum Deo loquuntur, imitati sacram scripturam pro sancta ducunt, & insternunt. nulli sedilibus in sanis vtuntur. characteres, præscriptos & certos gestus adhibent, palmas ad coelum expandunt, genua flectunt, incuruantes se vsque in terram, proni in faciem procidunt, toto corde & omnibus membris orationi incumbunt, in qua non valde multa verba repetunt, sed hæc precipua: *Soli Deo immortalis Creatori coeli & terra, præter quem non est alius, honor & gloria in secula seculorum.*

Cerimonia  
Turcica &  
Tartarica.

Precationi adiungunt ieiunium. affligunt enim totos dies animas suas non solum fame & siti, sed ab omni opere & verbis profanis abstinentes, nihil præter diuina curantes vsque ad intempestam noctem, capientes cibum non ad luxuriam, sed ad virium refectiorem. Rideat ieiunia nostra non fame, non siti, non cinere, non rerum diuinarum contemplatione, non vigilijs, non orationibus condita.

Ieiunium.

Sunt & in eleemosynis dandis liberales. neminem enim suorum vnquam mendicari, aut fame vel algore perire patiuntur. Adhibent tamen in hac beneficentia iudicium. nam non dant ijs qui eleemosynam in ingluuiem & luxum conuertant: sed pauperibus, debilibus, peregrinis, scholasticis, literis & ritibus Religionis ipsorum cognoscendæ studentibus.

Arcana diuina scrutari nefas prophanumque esse existimant, nostram temeritatem execrantes, quod quidam ex nobis de iudicijs & secretis diuinis, quæ magna abyssus vocantur, in suis commensationibus disputerent, nomen Diuinum frustra usurpent. Irridēt Tartari nostros Ecclesiast. seu prophetas, taxant tēpla iu-



pellestillis, sediliorum, ararum, simulacrorum, & Dei ad fenestram vergentis, & mulierem venustarum, lasciuia mouentium plena, quibus in sedilib. honoratiores molliter recumbant, cum res diuina agitur, dormiant. iidem obscurioris conditionis homines à confessu arceant, in templa multis cincti stipatoribus veniant, eisdem ante se suam ostentantes superbiam stare sinant. at ne ipse quidem Tartarorum Tyrannus, ante quemquam apparitorem, stipatoremque in Synagoga stare, aut se præ vulgo illustriorem esse patitur. non vllam sedem quærit, quanto maior est, tanto se humiliorem præstat.

Nos ætis pulsu, illi certis laudis diuinæ verbis ab vociferationibus ad templa se inuitant: nos quod in laudibus diuinis aures delectemus nostras buccinis, organis, harmonijs, verba precationis obscurantibus, & organis interea nostris naturalibus silentibus, reprehendunt.

*Sacerdotes.*

Quos habent sacerdotes ij, nec avari sunt, nec ambiciosi, neque voluptatibus, aut acquirendis possessionibus dediti, minus negotijs secularibus implicati: sed sunt frugi, mansueri, modesti, officij sui studiosi, religioni intenti, qui tantum præcitant, & legem interpretantur.

Taxantur etiam sacerdotes nostri non solum ab Ethnicis sed à vicinis nostris Ruthenis, quod vinum, quæ est res luxuriosa, bibant, carnes manducant, neque habentes in se procreandi sibi simile appetentiam, vxores ducant. cum nemo continens esse, nisi id ipsi Deus dederit, queat. ab his abstinent cælibes monachi Græcorum. Porro habuisse antiquitus sacerdotes suas vxores, id ex multis Sacræ Scripturæ locis liquet. Leuit. 21. 3. Esd. 9. Dan. 14. Ezech. 44. Baruch. 6. Luc. 1. 10. 18. ad Titum 1.

Quod si nunc etiam nostri facerent, abstinendo ante triduum, cum vasa domini portanda essent: viuerent sanctius quam in futuro cœlibatu delicati epulones. quos vti semper libidine aut concubinas alere, id est, vt Sophonias dicit, sanctum polluere necesse est. Et tamen nos in istos mercenarios officium laudandi Dei, nobis scil. graue, rejicimus: cum ij irritent potius suis prauis moribus, quam placent Deum, vices à nobis sibi delegatas, in vicarios negligentes rejiciunt: ipsi interea ociosi & voluptatibus intenti,

intenti, vt fuci mel apuro, sic isti labores populi comedunt, epulantur, sed; vestiunt splendide, ad munia Ecclesiastica, multa simul, nondum adulta ætate, nec sua natura perspecta, temerè aspirant. negotijs secularibus & profanis se immergunt.

Et licet olim sacerdotibus nefas erat habere partem possessionum cum populo Dei, præter Decimas: tamen nostri non contenti decimis, victimis, pro peccatis, primitijs, varijs quæstibus, quos à diuitibus, egentibus, nascentibus, nubentibus, ægotantibus, morientibus, mortuis percipiunt: adhæc præter opima prædia, multarum simul Ecclesiarum regimina, iactura publica, contra ius & rationem appetunt. cum interim alibi potius quam in his Ecclesijs, ad quas vt dicit Dominus, non per ostium sed tanquam fures & latrones ingressi sunt, non vocati viuunt, eas laicis, negotiatoribus, lænonibus locent, vendant. multæ sunt, quæ nunquam viderunt suos pastores seu plebanos.

Si quis à Regni finibus fermè per omnem Lituaniam & Samagiciam atq; Rulsiam, in Ecclesijs prouertuum adeò bonorum, vt vna multos alere queat, suos quærat pastores, nulla inuenietur in qua pastor assidue habitet, aut eam crebro inuisit. Ideo vacillat ouium fides, friget Dei amor, cessant diuinæ laudes. Contra tales verò multis locis detonant diuina oracula. Sed nolo me sacerdotibus, quibus nos & subijcere & ostendere debemus, post tot genera hominum à me laceratorum reddere infensum. satis sit hæc recensuisse. quibus in meliorem statum redactis, viuamus beatius, cum laude vestræ Regiæ, sed in primis Diuinæ maiestatis.

FINIS

FRAGMINVM MICHALONIS  
Lituanici.





IOHAN. LASICII  
Poloni,  
DE DIIS SAMAGITARVM  
CÆTERORVMQVE SARMATA-  
rum, & falsorum Chri-  
stianorum.

Item  
DE RELIGIONE AR-  
meniorum.



Amplius de  
regni Polo-  
nicæ

AMAGITIA mare attingit Balticum: cuius figura triangularis est. longitudo septuaginta milliarum Germanic. hanc separant fluuij: à Prussia Nemel, ab Curlandia regione Liuonica, Helingegau. quæ prouinciæ, aliæq; vsq; ad Borysthenem, in Pontum Euxinum illabentem, regis Poloniæ imperium agnoscunt. In ea reg. onis syluosa parte, quæ ad Regiomontum, Academia, anno Christi 1544. 17. Augusti instituta, plurimum claret. Sunt antiqui Borussi: lingua, moribus ab ijs diuersi Germanis, qui hodie permixti Polonis, Prussiam incolunt.

Origo Sama-  
gitarum.

Tradunt veteres, maiores Samagitarum, (Zamagitis enim se ipsi vocant) Italos fuisse. Neronem Imperatorem de bellica expeditione cogitatem, illos etiam exsules Romanos, qui in Giaros sterili quadam insula habitabant, euocare in militiam voluisse. Verum hos metu crudelitatis imperatoris consensu eorum à quibus bis teruè euocabantur nauibus, ipsismet autem cæsis.

ad

ad Pontum Euxinum appulisse. dehinc per saltus, vbi olim Romana venatio fuit, quicq; hodie magna ex parte excisi iam, Ruffiæ, Podoliæ, Lituanicæq; cognomina habent, vsq; ad mare Balticum, quod Russi, à Varetzgois quibusdam populis Liuonicis, *Mare Va-* quibus cum parebant, mare Varetzgoie appellant, penetrasse. rei *retzgoie.* huius vt idololatriam, gentisq; calliditatem, Romanæ similem: ita sermonem ex Latino quodammodo, barbaroq; cõflatum, indicium esse. Michalo fragmine quinto de moribus Tattarorum, & suorum Lituanorum, paulò hæc aliter refert, ait enim, classis Iulij Cæsaris ex Gallia in Britanniam nauigantis partem, coortis tempestatibus, ad litus Samagiticum, vbi nunc est arx Ploteli, peruenisse, sæpeque etiam hodie in illud ipsum litus, *Ploteli arx* naues nauigantium, vi ventorum eiici solere. vbi Lituanorum *Samagitica.* progenitores, periculis maris pertæsi, & prædis onusti, in tabernaculis ad focos, more militari, & adhuc in eadem Samagitia recepto, habitarent. vnde vltius progressi, lacuvingos atq; Roxolanos subegerint. Haud absurda coniectura. Nam & Zamagitia, propter mare vicinum, & Lituaniam superiorem, terræ inferioris appellationem habet: & Lituanorū cum Samagitis idem propemodū sermo est, idem habitus, iidem mores, eadem ferme religio. Quæ regio cum aquilonalis sit, tam parue sunt in ea media æstate noctis tenebræ, vt radij solis occumbentis excipiant orientē, tumq; plurimum agricolæ segetes demetant suas. nempe quoddam ante meridiem horis, totidemq; post, solis æstum *Solis ingens* ferre in agris messores nequeant. Et licet vix antè, quàm trib. post *æstus.* Pentecosten hebdomadis, agros conserant: tamen id ardor celestis efficit, vt eodem quo & apud nos tempore, messis fiat: æstas haud diu duret. similis in Molcouia feruor, (mirandam diuinam prouidentiam) sex hebdomadis, frugibus maturitatem adfert.

Secus fit in Iselandia vltra Sueciam, sub ipso polo. ibi enim sex mēsum dies est, totidem est nox, cuius tenebras focus perennis dispellit, qui locus abest à Stockholm metropoli & regia Sueciæ, trecentis milliariis Germanicis. Id Iohannes tertius, Rex Suecorum, qui nunc rerum potitur, cuiq; sua ditio bene nota est, quidam medico, is autem mihi narrauit. Sita est Stockholm in ipso littore, trans mare Balticum, è regione Samagiticæ.

F ■

*Dies sex  
mensium.*

Ceruifia.

Samagita  
annoſi.Res pecu-  
aria.

Solum Samagiticum fertile quidem est, sed cultores eius pi-  
gri, nec alijs quam ligneis, superstitione quadam, in arando vtun-  
tur vomeribus. Idcirco inopia panis laborant, cuius loco rapis  
tostis, quæ minori labore proueniunt, & instar humani capitis na-  
ſcuntur, vefci soliti. His verò absumtis, ad panem comedendum  
se conuertunt. Mellis albi, lactis, butyri, pecoris diuites, pinguib.  
pascuis felices. Nec eis pisces defunt. Potus, hydromel & ceruifia  
est. Hæc in vasis, ex corticib. factis, positis in cus saxis feruidis, ex  
aqua, frumento, lupulo, vna nocte cocta, prorinus fæces accipit,  
posteroq; die bibitur. percommoda alui purgandæ ratio. Præci-  
pui cornibus vrorum ornatis (boues sunt syluestres, valde fero-  
ces) pro poculis vtuntur: strenuos compotatores, cantharo hy-  
dromelis, indusio, mantili, manicis, sudariolo, seu re quauis alia  
operis domestici libenter donant. quib. ceruifia non est, ij aquam  
bibunt, proceri, agiles, animosi, robusti, ad arma prompti.

Viuunt autem vulgo centum annos. sunt enim frugales, &  
modicis exercitijs dediti.

Wladislai Iagiellonis Polonorum Regis opera, Anno hu-  
manæ salutis 1413. (Lituaniam autem 1387.) Christiana religione  
initiati sunt. quibus episcopum Miednici præfecit. duodecim  
parcecos dedit. dandis pecunijs, pannis cæruleis, pileisq; rubris,  
iuxta montem Schatria, ad baptismum amplectendum ille-  
xit. Vbi monacho regio, de mundo Adamoque à Deo creatis  
concionante, vnus illorum hisce verbis Regem compellauit:  
*Mentitur inquit, ô Rex, hic homo, non admodum senex, multis enim no-  
strum centesimum annum superauerunt: tamen hac minimè recordan-  
tur. eadem illi pueris quæ senibus cæli conuersio, eadem temporum vicif-  
situdo, idem cursus & fulgor syderum fuit. Cui Rex, officio & ipse  
concionatoris fungens, Verum autem, inquit: nec falsum sacerdos, qui non  
sua ætate, sed multis ante seculum diuino mandato ex nihilo  
existisse dixit.*

Rei pecuariæ adeò sunt studiosi, vt vnus agricola sexagin-  
ta, alius duplo plus, paullò minus alius cornuti pecoris, præ-  
ter oues & capras alat. Equi illorum paruuli: ob nimium opi-  
nor frigus: sed tamen robusti. quorum vno, Anno Domini 1554.  
duobus florenis Viennæ in Lituania emto, & trahæ iuncto,  
vestus

vestus sum cursu celeri vsque Cracouiam, 120. mil. Germanica-  
rum. Fœminæ pecori curando, viri agris colendis dant operam.  
iidem deni aut viceni, plures vel pauciores, in vno tugurio li-  
num, lanam, cannabim pestunt, nent, texunt, vestes conficiunt.  
Quicquid horum superest, id Rigam vel Regiomontum, hinc  
in Hollandiam, pretio tolerabili mittunt. lino enim maximè &  
cannabi, agros suos complent. Dispersè per syluas, campos de-  
gunt. rara oppida, nec pagos nimium multos, arces autem muni-  
tas nullas habent. quorum fenestræ meridiem versus spectant.  
Studio Sigismundi Augusti Regis, anno 1571. 7. Iulij mortui, in  
cætus & societates conuocati. Mapalia, quæ rures appellant, *Mapalia.*  
sursum angusta, atque quæ fumus & fœtor exeat, aperta, ex tignis,  
asseribus, stramine, corticibus faciunt. in his homines cum omni  
peculio, in pauimento tabulato stante, habitant. ita pater fami-  
liæ omnia sua in conspectu habet. & feram noxiam, & frigus  
à pecore arceat. ad ostium cubat, de altro foci custodia commissa,  
ne vel ignis damnum domicilio det, vel prunæ nocte extin-  
guantur. Vbi crebrò accidit, vt vel sus vel canis ex olla in foco  
stante, carnes auferat: aut rostrum, aqua feruente, lædat. Qui  
in pagis degunt, ii caulas separatas ab æstuariis habent. Tam  
hi quàm illi plumis concisis, culcitræ farciunt. quæ non  
possunt non pungere, & vigilantem reddere cubantem. Pater-  
familias, mactaris autumno auibus domesticis, iisq; pecudibus  
ac bobus, quos se brumæ tempore non posse alere animaduertit,  
genio cum suis indulget: quæq; superflua, ea doliis inclusa, ma-  
ritimis vendit. foras egressus, alcem, aprum, ceruum, auem, sci-  
rum, bombardam, venabulo, balista, arcu conficit. Sunt enim iacu-  
latores & sagittarii præstantes. in quorum curribus nihil omni-  
no ferri inuenias. omnia lignea, rotæ ex radicibus arborum in-  
flexis, quas procul audias venientes, axibus, quod eas non illi-  
nant, stridentibus.

Virgo nõ antè nubit, quàm triginta annos, aut minimum 24. *Virgines.*  
expleat: & ipsa manibus suis, aliquot corbes vestium, omnibus  
cum sponso venientibus dispartienda parat. tum enim dat  
singulis, vel indusium, vel mappam, vel mantile, vel texta è lana  
tibialia, vel chirothecas. hæc in agrum non prodit, ni prius pa-



rentibus inferuiat, & in omnibus morem gerat. idem facit filius, ac præmissi qui eam in matrimonium petat, primum omnium, num progenitoribus sit morigera, rei quæ familiaris studiosa, considerant. Et viri & feminae, sunt amantissimi honesti, rarissima apud eos homicidia, furta, stupra, incestus. puella stricto persequitur culro se ad impudicitiam sollicitantem. quæ duobus, ante & retrò pendentibus de zona tincinnabulis, nocte autem semper cum face incedit. quibus rebus monentur parentes, ubi sit, quid duc agat filia. Pater filio uxorem quærens, nec formam nec dotem spectat, satis esse ducens dotatam, si sit morata, quæ succi plena atque adulta, magna cum læticia, in domum foceri inducitur.

*Pudicitia.*

*Præfecti.*

Præfectos, quos Ciuonias vocant, non adeunt, quin ipsis aliqua munuscula adferant. Summus toti regioni, dum vivit, præest Lituanicus Senator. hodie est vireximus Iohan. Kisaka Palatino Vitepscensi natus, inter eos qui minoris dignitatis sunt, fuit Iacobus Lascouius, Polonus nobilis, tractus Calissiensis, ex quo hæc percepi: qui in hisce hominibus piè erudiendis, & in certa loca cogendis, Sigismundi Augusti iussu, plurimum operæ impendit. cui Deum Vnum prædicanti, respondebant idololatæ: *Quid tu nobis Vnicum Deum, quasi omnibus nostris potentior inculcas? pluri vno multi possunt, plura plures agunt.* Idem agros illorum ad 40. iugerum millia dimensus est. horum tria vni rustico assignata, præter alia minutiora commoda, quinque florenos fructus annui Regi adferunt.

*Sylva.*

Iussi autem à Lascouio arbores excindere, inuitissimi id, nec prius, quam ipsemet inchoaret, fecerunt. deos enim nemora incolere persuasum habent. Sequitur persuasionem effectus. nam in sylvis illorum horrenda quædam visa ac spectra, tam auribus, quam oculis spectantium sese offerunt. Tum vnus inter alios percontari, num etiam decorticare arbores liceret. annuente præfecto, aliquot magno nisu hæc repetens decorticauit: *Vos me meis anseribus, gallis, gallinaceis spoliastis: proinde & ego nudas vos faciam.* credebat enim demens deos rei suæ familiari perniciosos, intra arbores & cortices latere. Quorum tantus penè est numerus, quantus aliorum apud Hesiodum. Nam præter eum, qui illis est Deus Auxtheias Vissagistis, Deus omnipotens atque summus, permul-

tos Ze-

cos Zemopacios, id est, terrestres iij venerantur, qui nondum verum Deum Christianorum cognouerunt. Percunos Deus tonitrus illis est. quem cælo tonante, agricola capite detecto, & succidiam humeris perfundum portans, hisce verbis alloquitur: *Percune deuaite niemusk vnd mana, dievva melsu tavvi patsi mießu. Cohibe te inquit Percune, neue in meum agrum calamitatem immittas. ego verò tibi hanc succidiam dabo.* Verum postquam nymbus præterit, carnes ipse absumit. Percuna rete, mater est fulminis atque tonitru: quæ solem fessum ac puluerulentum, balneo excipit: deinde lotum & nitidum, postera die emittit. Audros deo, maris cæterarumque aquarum cura incumbit. Algis, angelus est summorum deorum. Aulca, dea est radiorum solis vel occumbentis, vel supra horizontem ascendentis. Bezlea dea vespertina, Breksta tenebrarum. Ligiczus, is Deus esse putatur, qui concordie inter homines, & auctor est & conservator. Datanus donator est bonorum, seu largitor. Kirnis cætalos arcis alicuius secundum lacum sitæ curat. in quos, placandi eius causa, gallos mactatos iniiciunt, cæteosque accentos in eis figunt. nimirum sicut ille avarus Euclio apud Plaut. in Aul. rure ac corona laris gratiā aucupabatur:

*Nunc iusculum emi, & hæc coronas floreas,*

*Hæc imponentur in foco, nostro lavi:*

*Ut fortunatas faciat nata nuptias.*

Kremata porcorum ac iuum est Deus. cui similiter focos excitant, & ceruisiam super eas fundunt. Pizio iuventus, sponsam adductura sponso, sacrum facit. puellæ quoque quendam Gondu adorant & inuocant. Modeina & Ragaina sylvestres sunt dii: vti Kierpiczus huiusque adrutor Siliniczus, musci in sylvis nascentis: cuius in ædificiis magnus apud illos est vsus. huic etiam muscum lecturi sacrificant. Tavvals Deus, auctor facultatum. Orthus lacus est piscosus quem colunt, quemadmodum & Ezernim lacuum Deum.

Sunt etiam quædam veteres Nobilium familiæ, quæ peculiare colunt deos. vt Mikutiana Simonaitem, Michelouiciana Sidzium, Schemietiana & Kiesgaliana Ventis Rekieziouum, aliarum alios. Kurvvaiczin Eraiczin agnellorum est deus, est & Gardunithis cultos eorundem recens editorum. Prigustitis hic est

qui murmurantes exaudire putatur. iubent igitur ut quis sum-  
misso murmure, hoc vel illud loquatur, ne clamantem Prigirski-  
tis audiat. Derfintos pacem conciliat. ut & Bentis is creditur, qui  
efficit, ut duo vel plures simul, iter aliquod instituunt. Lavvkpati-  
mo itur aratum vel satum supplicat. Priparfics est, qui augere  
nefrendes existimatur. Ratainicza equorum habetur deus, ut  
Walgina aliorum pecorum. Kriksthos cruce in tumulis sepul-  
torum custodit.

*Diuinatione.*  
*III.*

Sunt & omnium auguriorum, diuinationumque obseruantes,  
habentque Apidome mutari domicilij deum, nato cuiusvis gene-  
ris, vel cæco vel debili pullo, actutum sedes mutantur. Quin i-  
pse quoque rex Wladislaus, gente Lituanus, has à matre super-  
stitiones didicerat, ut eum diem infaustum sibi futurum crederet,  
quo primum calceum sinistrum fortuito accepisset. ad hoc mo-  
uebat se interdum in gyrum stans pede vno, foras è cubili prodi-  
urus, quorum similia multa obseruantur ab Samagitibus. Ita olim  
Germani, Plutarcho in Caio Cæsare teste, non ante prælium cum  
hoste committebant, quam noua luna fulsisset. Ex nostrum qui-  
dam infelicitate se venaturos sibi persuadent, si domo egressis  
mulier occurrat, seu quis certum numerum capiendorum lepo-  
rum, vulpium, luporum nominet. Krukis suum est deus, qui reli-  
giosè colitur ab Budraicis, hoc est, fabris ferrarijs. Lasdona auel-  
lanarum, Babilos apum dii sunt. hunc Russi Zolim cognomi-  
nant. Sunt etiam deæ, Zemina terrestris, Austheia apum, utraq;  
incrementa facere creduntur: ac cum examinantur apes, quod  
plures in alueos aliunde adducant, & fucos ab eis arceant, ro-  
gantur.

*Mellis co-*  
*pit.*

Nusquam autem vel candidius mel est, vel minus cæræ habet.  
vnde illæ massæ cæræ, quæ nauibus in Belgium, Galliam, Hi-  
spaniam deportantur. Præterea, sunt certis agris, quemadmo-  
dum nobilioribus familijs, singulares dei. videlicet Deuoitis a-  
gri Poiurskij, Verustis Retorvskij, Guboi ac Tvverticos Sara-  
kovskij, Kirnis Plotelskij. Vielona Deus animarum, cui tum  
oblacio offertur, cum mortui pascuntur, dari autem illi solent  
frixæ placentulæ, quatuor locis sibi oppositis, paululum discit-  
sæ. eæ Sikies Vielonia pemixtos nominantur. Waspulis is esse  
puta-

putatur, qui sonitum ante & post tonitru, in aere facit. Cæretum  
quid agant Salaus, Szlotrazis, Tiklis, Birzulis, Siriczus, Dvvar-  
gonth, Klamals, Arlaibos, alijque eius generis, non libenter id  
Christianis aperiunt. Opirulatores illos hominum esse, ideoque  
invocandos persuasum habent. Numeias, vocant domesticos, ut *Dii domo-*  
est Vblanicza deus, cui curæ est omnis supplex. Dugnai dea, præ- *fici.*  
est farinæ subactæ. Pesseias, inter pullos omnis generis recens  
natos, post focum latet. Trajitas Kirbixtu, deaster est, qui scin-  
tillas tugurii restinguit. Alabathis, quem linum pexuri in auxi-  
lium vocant. Polengabia diua est, cui foci lucentis administra-  
tio creditur. Aspelenie, angularis. Budinraia, hominem dormien-  
tem excitat. Matergabia deæ offertur à foemina ea placenta, quæ  
prima è matra sumta digitoque notata, in furno coquitur, hanc  
post, non aliud quam paterfamilias, vel eius coniux comedit. Si-  
mili modo Rauguzemapati offerunt, posteaque ebibunt, pri-  
mum vel ceruissæ vel aquæ mulsæ, è dolio haustum, quem Nu-  
laidimos, illum autem primum è massa exemptum panem, Tas-  
vvirzis cognominant. Eidem ceruisiario deo offert, id est, præbi-  
bit paterfamilias ceruisiæ, post fæces acceptas intumescens, spu-  
mantem paterani, tum demum & alij hauriunt. Si is absit, mater  
id familiam facit. Luibegeldas diuas venerantes, ita compellant:  
*Luibegelda per mare porire sekles gillie skute. Vos dea transmisisti ad nos  
omnia semina fil ginea, in putamine glandis.*

Eadem turba agrestis, ut est auctor Alexander Gvagninus, in *Festum post*  
Sarmatia, sub finem mensis Octobris, frugibus, planè collectis, so- *collectas*  
lenne quoddam sacrificiū, eo modo celebrat. nam omnes ad sa- *fruges.*  
cras epulas coacti, mensæ foentum, postea panem, ac ex utraq;  
parte duo vasa ceruissæ plena imponunt. deinde adducta utriusque  
sexus domestica animalia, sue, gallo, anseri, virulo, & si quæ sunt  
alia, hoc ritu mactant. primus augur, certa verba prolocutus, ani-  
malis caput cæteraque membra fuste verberat: quem turba idem  
agens, ac hæc dicens sequitur. *Hæc tibi o Zemiennik deus, gratias agen-*  
*tes offerimus: quod nos hoc anno incolumes conseruaueris, & omnia nobis ab-*  
*unde dederis. idem ut & in posterum facias, te oramus.*

Antequam verò ipsi comedant, uniuscuiusque; ferculi portio-  
culam absicilam, in omnes domus angulos, ista dicentes abijciunt:



Accipe ô Zemienik grato animo sacrificium: atq; latus comede. tum de-  
mum ipsi quoq; prælaurè epulantur. qui ritus etiam in nonnullis  
Lituaniae atq; Russiae locis obseruatur, ac Ilgi dicitur. fieri id sa-  
crum Lasconius ait postridie festi omnium sanctorum. qui dies  
est secundus Nouembris. quo die Samagitæ, Prussis, quibus erant  
oppignerati, quiq; in terra ipsorum fuere, excisis, Vitoldo duci  
Lituaniae, (qui diem obiit 1430. 27. Octob. Wladislai Iagiello-  
nis, patruelis frater) sese ultro subiecerunt. Tertio post Ilgas die,  
deum Vvaizganthos colunt virgines, ut illius beneficio, tam lini  
quàm cannabis habeant copiam. ubi altissima illarum, impleto  
placentulis, quas Sikies vocant, sinu, & stans pede vno in sedili,  
manuq; sinistra sursum elata, librum prolixum, vel tiliae vel vimo  
detractum (ex quo etiam calceos contextunt) dextra verò crato-  
rem ceruiciae, hæc loquens tenet: *Vvaizganthos deuaite auging mani  
linu teip ilgies, ikmani, nie duok munus nogus esthi. Wvaizganthos, inquit,  
produc nobis tam altum linum, quàm ego nunc atra sum; neve nos nudos  
incedere permittas.* post hæc craterem exhaurit (nam & foeminae  
bibaces sunt) impletumq; rursum, deo in terram effundit, & pla-  
centas è sinu eiicit, à deastris, si qui sint Vvaizgantho, comedenda.  
Si hæc peragens, firma perstet, bonum lini prouentum anno  
sequenti futurum, in animum inducit. Si lapsa, pede altero nira-  
tur, dubitat de futura copia, fidemq; effectus sequitur. Iisdem fe-  
riis, mortuos è tumulis ad balneum & epulas inuitant: totidem-  
que sedilia, mantilia, indusia, quot inuitati fuerint, in tugurio  
eam ad rem præparato ponunt, mensam cibo, potu onerant. de-  
hinc in sua mapalia reuersi, triduum compotant. quo exacto, illa  
omnia in sepulcris, potu perfusis, relinquunt. eandem etiam ma-  
nibus valedicunt. Interea hæc ij auferunt, qui in syluis arbores  
cineris causa, quo fullones transmarini carere nequeunt, combu-  
runt, & asseres faciunt, nauium materiam, in Oceanum mitten-  
dam, confimili huic errore, Christiani, seculo beati Augustini, in  
cœmeteriis apud memorias defunctorum, ut idem epistola 64.  
ait, comessabantur.

Prussi in  
cidati.

Parentalia.

Zinonum  
superstitio.

Veri quoq; Liouones hoc tempore, qui dura Germanorum ser-  
niture premuntur, monumentis mortuorum cibum, potum, se-  
curim, & non nihil pecunie, hac cum nœnia imponunt: *Transi in-*  
quit

quit ô miser ab hoc rerum statu, in mundum meliorem. Vbi non tibi Ger-  
mani amplius, sed tu illis imperabis. habes arma, cibum, viaticum.

Cum autem nimia æstatis breuitas, fruges demessas, planè sic-  
cari non sinat, sit hoc sub testis ad ignem. Tum verò precandus  
est illis hisce verbis Gabie deus: *Gabie deuaite pokielki, garunuleuki  
kyrbixstu. Flammam inquit eleua, at ne demittas scintillas.*

Smik Smik Perleuenu. hunc deum Lituani vere araturi, vene-  
rantur. prima agri lyra vomere facta, huius ipse est. quam huic  
qui illam duxit, toto anno transgredi haud licet: alioquin diuum  
sibi infensum haberet.

Skierstuvves festum est farciminum. ad quod deum Ezagulis ita  
vocant: Vielona velos atteik musmup vnd stala. *Veni, inquit, cum  
mortui, farcimina nobiscum manducaturus.*

Aicvvaros est incubus, qui post sepes habitat. id enim verbum  
ipsum significat.

Kaukie, sunt lemures, quos Russi Vboze appellant: barbatuli,  
altitudine vnius palmi extensi: ijs qui illos esse credunt conspi-  
cui: aliis minimè. his cibi omnis edulii apponuntur, quod nisi fiat,  
ea sunt opinione, ut ideo suas fortunas (id quod accidit) amit-  
tant: nutriunt etiam quasi deos penates, nigri coloris, obesos &  
quadrupedes, quosdam serpentes, Giuoitos vocatos. hos timore  
perculsi, dum ex antris ædium ad pastum appositum prorepunt,  
seque pastum in ea recipiunt, aspiciunt & colunt. Si quid infortuni  
accidat cultori, serpentem malè fuisse tractatum censent.

Lemures  
palmares.

Srutis, & Miechutele, colorum dii sunt: quos in syluis, colores  
ad lanam tingendam quærentes venerantur.

Isti sunt pluresq; alij vulgi Samagitarum dii, quemadmodum  
apostolus, Sunt inquit dii & domini multi, i. Corin. 8. at Christia-  
norum. Vnus Deus est, Pater Filius & Spiritus Sanctus, in cuius  
nomine sacrum Baptisma sumitur, & in quem, iuxta formulam  
symboli Apost. creditur. qui personis discreti, essentia vnus sunt.  
omnia quæ hæc mundi machina continet, fecerunt, neq; post hæc  
otiantur: Pater inquit meus usq; adhuc operatur & ego operor.

Et tamen permulti sunt Christiani, qui hoc vnico omnipotenti  
numine minimè contenti, & tam Samagitas quàm veteres ido-  
lolatras imitari, alios sibi ipsis adiutores finxerunt. Iohannes enim

*Dii falsarii  
Christiano-  
rum.*

& Paulus superstitiosa opinione illorum, quæq; noxia à segetib. auerit. Ignis Agathæ, seu Vestæ datus est curadus. Florianus miles, incendia restinguit. ut quidem hæc lib. de Origine erroris recenset Bullingerus. Nicolaus, quasi alter Neptunus, maris curam gerit. idem à periclitantibus, iis vocibus excitatur: O sancte Nicolae, nos ad portum maris trahere. eidem sacella in littorib. consecratur. huius collega est, gigas Christoph. Canitur & B. Virgini, exortis procellis istud carmen: Ave maris stella, Dei mater alma. Et, Salve Regina misericordig, vita & spes nostra, ad te clamus. Vino præest Urbanus. Rubiginem frumeti purgat Iodocus. Brucos depellit Magnus. Anseres curæ sunt sancto Gallo, oves Vendelino, equi Eulogio, boues Pelagio, porci Antonio. alia nomina in alijs regionibus, harum similiumq; rerum ficti curatores habent. Gertrudis mures à colis mulierum abigit. Literarum studiosi Catharinam Virginem Alexandrinam, veluti alteram Minervam, alii verò Gregorium, quasi Mercurium colunt, ac huius die festo primum, suos natos, in scholas mittunt. Pictores Lucæ, Medici Cosmam & Damianum, fabri Eulogium, calcearii Crispinum, Sarctores Gutmanū. figuli quendam Goarum, venatores Eustachium ciuem Romanum, scorta Aphram & Magdalenam inuocant. supplicat alij alijs, ac in periculis vitæ confuturi, vota illis nuncupat: in hos tutelam sui reijciunt. Imploratur in pestilentia, ut olim Apollo, Sebast. in morbo Gall. Rochus in febre Perronella, in dolore capitis Ita: dentium Apollonia, in partu Margarita, quemadmodū quondam Iuno ac Lucina. Ioh. Euang. à veneno conseruat. Wolphgang. contractorū Medicus est. Romanus Dæmoniacos soluit. Marcus mortem repentinam auerit. Martinus miseriam, quem & ego puer hisce verbis inclamabam: *Martine Sancte Pontifex, sis miserorū opifex, fer opem tuū famulū.* Leonhard. victorum compedes rumpit. Vincentius amissa restituit. Valentīn. comitiali morbo laborantes sanat. quapropter nos epilepsiā, Valen. morbū vocamus. Susanna ignominia arcet. Otilia oculis ægrotorū medetur. collo præsidet Blasius, scapulis Laur. Erasmi venter est totus. Nicolao apud nos gregis est custodia iniuncta. Andreas, vigilia festi sui inuocat? à ieiunis puellis, futuros illarum viros præmonstrat. Barbara à cædib. bellicis conseruat.

quocir-

quocirca tum à nostræ gentis hominibus in auxilium magnis clamoribus elicitur. inuocatur & virgo Maria. cuius carmen, Deipara vocatum, ab ijs qui in bellum proficiscuntur decantatur. legibus additum nostris. *Aded etiam periculosis temporibus, Deus seruator omnium, suo honore fraudatur.*

Præterea sunt patroni terrarum constituti, non diuina, sed humana voluntate. Stanislaus Polonorum, Albertus Prussorum, *Defensores* Nicolaus Moscorum, Martinus Germanorum, Iacobus Hispanorum, Dionysius Gallorum, Petrus, Paulus Romanorum, Marcus Venetorum, tres magi Colonienſium, Ambrosius Mediolanensium, virgo Maria & Ladislaus Hungarorum. quod etiam aurei nummi testantur. at quis non videt, quomodo ijs suas prouincias tueantur?

Ridet hæc suauiter in Naufragio Erasmus Rot. minimè Lutheranus. Quamobrem tu, inquit, nullius diui præsidium implorasti? Quia spaciosum est cælum, respondet alter. Si cui diuo commendaro meam salutem, puta sancto Petro, qui fortasse primus audiet, quod adstet ostio, priusquam ille conueniat Deum, priusquam exponat causam, ego iam periero. rectà adibam ipsum patrem, dicens: Pater noster qui es in cælis. nemo diuorum illo citius audit, aut libentius donat quod petitur.

Verum cum omnis hitoria quoquo modo scripta delectet, non pigebit lectoris causa de moribus nostrorum Sarmatarum plura adscribere. Hæc igitur Iohannes Meletius Archipresbyter Ecclesiæ Liccensis in Prussia, Anno salutiferi partus 1553. ad Georgium Sabinum poetam, litteris prodidit. quæ etiamnum multis in locis obseruantur. Die Georgij sacrificium faciunt Pergrubrio, qui florum, plantarum omniumque germinum deus creditur. Sacrificulus enim, quem Wurschaiten appellant, tenet dextra obbam ceruissæ plenam, inuocatoq; dæmonij nomine, decantat illius laudes. Tu, inquit, *abigis hyemem, tu reducis auentatem verū, per te agri & horti vigent, per te nemora & sylua frondent.* hac cantilena finita, dentibus apprehendens obbam, exhibet ceruissam nulla adhibita manu: ipsamq; obbam, ita mordicus epotam, reero, supra caput iacit. quæ cum è terra sublata, iterum impleta est: omnes quotquot adsunt, ex ea bibunt ordine, atq; in laudem

*Historia delectat.*

*Plura de illis Sarmatis.*



Pergrubij hymnum canunt. postea epulantur tota die & choreas ducunt.

*Inuocatio  
deorum.*

*Victima.*

Similiter, quando iam segetes sunt maturæ, rustici in agris ad sacrificium congregantur. quod lingua Ruthenica Zazinek vocatur, id est, initium mæsis. hoc sacro peracto, vnus è multitudine electus, mæsem auspicatur, manipulo demesto, quem domum adfert. postridie omnes, primò illius domestici, deinde cæteri quicunque volunt, mæsem faciunt. facta autem mæsse, solenne sacrificium pro gratiarum actione conficiunt. quod Ruthenica lingua Ozinek, id est, consummatio mæsis dicitur. in hoc sacrificio, Sudini Borussiae populi, apud quos succinũ colligitur, capro litant. congregato namq; populi cœtu in horreo, adducitur caper. quem Vvurschaites mactaturus, imponit victimæ vtramq; manum, inuocatque ordine dæmones, quos ipsi deos esse credunt. videlicet Occopirium, deum cœli & terræ, Antrimpum maris, Gardoeten nautarum, Potrympum fluviorum ac fontium, Piluitum diuitiarum, Pergrubrium veris, Parguum tonitruum ac tempestatum, Pocclũ inferni ac tenebrarum, Pocollum aëreorum spirituum, Putscetum sacrorũ lucorum tutorem, Auscũtum incolumitatis & ægritudinis, Marcoppolum magnatum & nobilium, Barstuccas, quos Germani Erdmenlin, hoc est, subterraneos vocant. His inuocatis, quotquot adsunt in horreo, omnes simul extollunt caprum, sublimemq; tenent, donec canatur hymnus. quo finito, rursus eum sistunt in terra. Tum sacrificulus admonet populum vt solenne hoc sacrificium, à maioribus piè institutum, summa cum veneratione faciant, eiusque memoriam religiosè ad posteros conseruent. Posthæc mactat victimam, sanguinemque patina exceptum dispergit; carnem verò tradit mulieribus, eodem in horreo coquendam. quæ interea dum caro coquitur, parant è farina siliginea placentas, quas non imponunt in furnum, sed viri focum circumstantes, hinc illinc per focum iaciunt absque cessatione, quoad indurescant & coquantur. his peractis epulantur atque helluantur tota die ac nocte, vsque ad vomitum. deinde summo mane extra villam progrediuntur: vbi reliquias epularum certo in loca

loco terra operiunt, ne vel à volatilibus, vel à feris diripiantur. postea suam quisque domum repetit.

Cæterum ex omnibus Sarmatiæ gentibus, Borussia, Liunionibus, Samagitis, Russis, multi adhuc singulari veneratione colunt Putscetum, qui sacris arboribus & lucis præest. is sub sambuco domicilium habere creditur. cui passim homines litant, pane, ceruisia aliisque cibis sub hac arbore positis, precantes eum vt placatum efficiat Marcoppolum, deum magnatum & nobilium, ne graui seruitute ab illis premantur: vtque sibi mittantur Barstuccæ, quibus in domibus ipsorum viuentibus, credunt se fieri fortunatiores. His ipsi collocant vesperti in horreo super mensam, mappa stratum, panes, caseos, butyrum & ceruisiam. nec dubitant de fortunarum accessione, si mane hos cibos absumptos reperiant. Quod si aliquando intactus cibus in mensa remanet, magna anguntur cura, nihil non aduersi intuentes. Eædem gentes colunt spiritus quosdam visibiles, qui lingua Ruthenica Coltxi, Græca Cobili, Germanica Coboldi vocantur. Hos habitare credunt in occultis etiam ædium locis, vel in congerie lignorum. Nutriūtque eos lautè omni ciborum genere, eo quod afferre soleant altoribus suis frumentum, ex alienis horreis furto ablatum. Cũ verò hi spiritus alicubi habitare atque ali cupiunt, hoc modo suam erga patremfamilias voluntatem declarant: in domo congerunt noctu segmenta lignorum, & multris lacte plenis imponunt varia animalium stercorea. Quod vbi paterfamilias animaduertit, nec segmenta dissipauerit, nec stercorea è multris eiecerit, sed de inquinato lacte cum omni sua familia comederit, tunc illi apparere permanereque dicuntur. Præterea Lituani & Samagitæ in domibus sub fornace, vel in angulo vaporarij vbi mensa stat, serpentes fouent, quos numinis instar colentes, certo anni tempore precibus sacrificuli, euocant ad mensam. Hi verò exeuntes per mundum linæolum conscendunt, & super mensam morantur. Vbi delibatis singulis ferculis, rursus discedunt, seque abdunt in cavernis. Serpentibus digressis, homines læti fercula prægustata comedunt, ac sperant illo anno omnia

*Penates.*

*Cultus spirituum.*

*Serpentum.*

prosperè sibi euentura. Quod si ad preces sacrificuli, non exierint serpentes, aut fercula apposita non delibauerint: tum credunt se anno illo subituros magnam calamitatem. Adhuc eadem gentes habent inter se sortilegos, qui lingua Ruthenica Burti vocantur. ij Pottrimpum inuocantes, cæram in aquam fundunt, atq; ex imaginibus interfundendum expressis, pronuntiant & vaticinâtur, de quibuscunq; rebus interrogati fuerint. Noui ipse mulierculam, quæ cum diu reditum filij absentis expectasset, ex Borussia in Daniam profecti, cōsuluit super eo sortilegum. à quo edocta est, naufragio illum periisse. cæra enim in aquam fusa, expressit formam fractæ navis, effigiem resupini hominis iuxta nauim fluitantis. Apud Samagitas est mons ad fluium Neuualsam situs, in cuius vertice olim perpetuus ignis à sacerdote conseruabatur, in honorem Pargni, qui tonitruum & tempestatum potens esse, à superstitiosa gente adhuc creditur.

Hactenus de sacrificijs. nunc de ritibus nuptiarum ac funerum, non minus ridicula quàm superstitiosa narrabo.

Ritus nuptiales.

Apud Sudinos, Curonenses, Samagitas, & Lituanos nobiles puellæ multis in locis gestât tintinnabulum, quod funiculo alligatum, è cingulo dependet vsq; ad genua. nec ducuntur, sed rapiuntur, in matrimonium. veteri Lacedæmoniorum more à Lycurgo instituto, rapiuntur autem non ab ipso sponso, sed à duobus eius cognatis. ac postquam raptæ sunt, tunc primùm requisito parentum consensu, matrimonium contrahitur. Cum nuptiæ celebrantur; sponsa ter ducitur circa focum: deinde ibidem in sella collocatur, super quam sedenti, pedes lauantur aqua, qua lectus nuptialis, tota supellex domestica, & inuitati ad nuptias hospites consperguntur. Postea sponsæ os oblinitur melle & oculi teguntur velamine, quibus sic velatis, ducta ad omnes edium fores, iuberur eas attingere dextroque pulsare pede. ad singulas fores circumspergitur tritico, filigine, auena, hordeo, pis, fabis, papanere, sequente vno sponsam cum sacco pleno omnis generis frugum. Cumq; eam hic circumspergit, inquit, nihil defuturum sponsæ si religionem coluerit, remq; domesticam ea qua debet diligentia curauerit. His actis aufertur sponsæ velamen ab oculis, & conuiuium celebratur. Similis olim obnubendi ratio

capitis apud Latinos, nuptæ nuptiarumq; nomen dedit. Vesperi sponsæ ad lectum deducendæ, abscinduntur inter saltandū crines, tum ei à mulieribus imponitur sertum, albo linteolo obuolutum, quod vxorib; gestare licet donec filium pepererint. rādiu enim se pro virginibus gerunt, ad extremum introducit in cubiculum: pulsataq; & verberata aliarum pugnis, non iratarum, sed nimia quadam læticia gestientium, in lectum iniicitur sponsoq; traditur, tum pro bellarijs afferuntur testiculi caprini vel vrsini, quib; illo nuptiali tempore manducatis, creduntur coniuges fieri fecundi. Eandem ob causam nullum animal castratum ad nuptias mastatur. Contrā in funeribus hic seruatur à rusticis ritus: Defunctorum enim cadauera vestibus & calceis induuntur Parentalia, & erecta super sellam locantur, quibus assidentes propinqui perpotant ac helluantur. epota verò ceruisia, sic hisce verbis lingua Ruthenica funebri lamentatio: *Ha lele i procz, ti mene vmarli i za ti nie miel szco iesz, qbo piti? i procz, ti vmarli? ha le le, i za ti nie miel Krasnoie miodzice? i procz, ti vmarli? id est, Hei hei quare tu mihi mortuus es? an non quod comederes vel biberes habuisti? quare mortem obisti? hei hei mihi, num formosa coniuge caruisti? cur diem obisti?* Hoc modo lamentantes enumerant ordine omnia externa mortui bona, liberos, oues, boues, equos, anseres, gallinas, ad quæ singula respondent, occinunt hæc nœniam: Cum hæc habueris, quamobrem mortuus es? Lamentatione absoluta, dantur cadaueri munuscula. mulieri fila cum acu: viro linteolum collo eius implicatum. Cum ad sepulturam effertur cadauer, pleriq; equis funus prosequuntur, & ad currum obequitant, quo cadauer vehitur. Striditq; gladijs verberat auras, vociferantes. Geigeite begaite pekelle. Eia fugite dæmones in Orcum. Qui funus mortuo faciūt, nummos projiciunt in sepulchrum, futurum mortui viaticum, panem quoq; & lagenam ceruisiæ plenam, ad caput cadaueris in sepulchrum illati, ne anima vel siciat vel esuriat, collocat. Vxor verò tam oriente quàm occidente sole, super extincti coniugis sepulchrum sedes vel iacens, lamentatur diebus triginta. Cæterum cognati celebrant conuiuia die à funere tertio, sexto, nono & quadagesimo, ad quæ animam defuncti inuitant, precâtes ante ianuam. Vbi tacitè assident mensæ, tanquam muti, nec vtuntur cultis: ministrantibus

Dæmones fugantur.



duabus mulieribus, sed absq; cultris, cibumq; hospitibus apponentibus. Singuli verò de vnoquoq; ferculo aliquid infra mensam abijciunt, quo animam pasci credunt; eiq; potum effundunt. Si quid fortè deciderat in terram de mensa, id non tollunt: sed desertis, ut ipsi loquuntur animis, quæ nullos habent vel cognatos vel amicos viuos, à quib. excipiantur conuiuio, relinquunt manducandum. Peraçto prandio, surgit à mensa sacrificulus, & scopis domum verrens, animas mortuorum cum puluere, tanquam pulices, hæc dicens eiicit, *Teli, pili, dusice, nu ven, nu ven, Edistu inquit, bibistu, anima, ite foras, ite foras.* posthæc incipiunt conuiuia inter se colloqui & certare poculis, mulieribus viris præbipientibus, & viris vicissim illis, seq; inuicem osculantibus. Hæc de parentilibus paganorum, quorum & sanctus Augustinus sermone 19. de sanctis meminit: Miror inquit cur apud quosdam infideles hodie tam perniciosus error increuerit, ut super tumulos defunctorum cibos & vina conferant, quasi egressæ de corporib. animæ, carnalēs cibos requirant. epulas enim & refectiōes, caro tantum requirit, spiritus autē & anima ijs non indigēt. Parare aliquis suis charis dicit, quod ipse deuorat, quod præstat ventri, imputat pietati.

DE RELIGIONE ARMENIORVM.

**A**RMENII à Thaddæo Apostolo, quem Christus ad Abgarum Regem Edeffenorum, ut Eusebius lib. 1. historię tradidit, cum epistola ablegauerat, religionem Christianam se didicisse, arcam Noe sua in regione cōsedisse, genusq; humanum in ea propagatū esse gloriantur: Quod ut verum esse concedamus: fatendum est tamen, quædam illos, ut multos alios, minimè Apostolica in vsu habere. quæ rerum omnium condicio est, ut eæ procedente tempore, à sua origine degenerent atque destestant. Extat fidei illorum in Deum satis orthodoxa formula, ab Abdia Prætorio Latina facta, Vitebergæ typis edita. Nobis hic sermo est de ijs, qui Leopoli in Russia, vrbe regis Poloniae, sedes pridem fixerunt suas. Viri honesti, humani, aperti, generosi, oris liberi, sed tamen cauti, elegantes, mundi, locupletes, vultu nitidi, barbis nigri, mercimonijs per orientales plagas dediti, in redimendis captiuis Christiani nominis, & dan-

& dandis elemosynis liberales. habent Leopoli Episcopum: qui Anno nati mundi Seruatoris 1574. cum Constantinopoli esset, ego cum duobus sacerdotibus (sunt autem sex) de Religione ipsorum collocutus sum. à Papa Romano, inde à temporibus Calixti, nihil accipiunt: nec eum pro capite Ecclesię agnoscunt.

Lingua vernacula, sacra sua obeunt. in liturgia Sacramentum eleuant: idemq; pro viuīs & mortuis Deo offerunt ac in ciborio ægrotorum causa seruant. Processiones, quas vocant, non cum sacramento, sed in memoriam Christi, qui huc atque illuc itabat, faciunt ac retinent. matrimonia sacricolę hisce verbis, *Quos Deus coniunxit, ne homo seungat*, confirmant.

In templis terna altaria habent. ad maius versi sese inclinant signoque crucis signant. Liturgias sacerdotes conducti pretio, ut conductoris mentio nominatim in eis fiat, celebrant. ante maius altare, itidem ut Russi, vellum nigrum expandunt. vnde ij qui sacris operantur, ad populum prodeunt. prope hunc locum, qui chorus appellatur, mares, scēminę remotius ab eo supplicant: At Russi simul cum mulieribus. imagines vtrique colunt. Armeniorum crebrius quàm Russorum sacerdotes concionantur.

In Sacramento eucharistiæ, elementa naturas suas amittere negant. intinctum in calice panem similagineum, plebi porrigunt. Aquam vino non miscent. Sacramentum religiosius Russis venerantur: persuasi Christum esse in illo, qualem Maria peperit; incarnatione semel facta, talem naturæ diuinæ cum humana coniunctionem societatemque esse, ut eæ ne tum quoque cum pateretur, separatæ fuerint, nec vnquam separari possint. Christum plus quiddam in liturgia pati, quàm in cruce perpeßus sit, ex Chrysostomo hauserunt. id autem, corporis eius Sacramentalem fractionem dicunt. Quærente verò me ex illis, quo id fieret modo, siquidem naturæ panis & vini, etiam facta consecratione, immutatæ permanerent: vi diuina, respondebat, cui fides habenda sit. Minus in eo sunt religiosi Russi, quorū sacerdos ex allatis in templum grandib. panibus (adfert autem vnus vir, vel vnum vel duos vel tres, quos plascuras vocant) orbiculum Sacramenti causa excindit, ac consecrat. cuius panis eo excisi modo fit interdum tantus numerus, ut superet capita sumentium abijciaturq;

*oblaciones.*

à Sacricola mucidus in angulum, aut terra obruatur, vel in alium conuertatur vsum. quod Armenij vehementer improbant. Sunt & ieiunia Armenijs duriora Russicis. nam præter diem Mercurij & Veneris, quibus solis leguminibus vescuntur, Russis pisces quoq; addentibus, quotannis ter quadraginta dies ieiunant: si est ieiunium dicendum, quotidie semel edere. Mosis ieiunium ante natalem domini, Christi ante pascha, Eliæ ante festum crucis obseruant. Tempia in honorẽ sanctorum edificant. Beatam Mariam matrem Domini, ita vti alij mortales nascuntur, conceptam natamque esse: sed postea sanctam factam, & vt Dei mater fieret semperque illibata virgo maneret, persuasum habent. Patrem, Filium & Spiritum S. esse Vnum Deum: Spiritum à solo Patre ad Filium, ab hoc ad Ecclesiam procedere ac mitti credunt. Omnia Biblia scripta admittunt. præter quæ, alia quoque multa & Canonem sancti Iacobi, pro Apostolicis ducunt. non potuisse ad nos Occidentales multa ab Orientalibus scripta peruenire, sed apud se plura esse autumant. Baptisma sacrum in nomine Patris, Filij & Spiritus Sancti accipiunt: ad quod infantes admittunt.

Tria concilia approbant, Nicenum, Ephesinum, Constantinopolitanum: at Chalcedonense reiiciunt.

Sacerdotes illorum quemadmodum Russorum, vxores ducunt. Attamen contenti eleemosynis, nullas possessiones tenent, nec artes mechanicas exercent. Quorum vnus à me de iustificatione hominis apud Deum, rogatus, respondit eam contingere operibus pijs, videlicet precibus, ieiunio, eleemosynis, de quibus ipsiusmet Christi in Euangelio Matthæi præcepta exstarent. Eadem de re interrogatus iunior, sed sapientior, id responsi dedit, solum Christum vniuscuiusq; credentis iustitiam esse. tamen homines pietati incumbere debere: vt ex fructib. arbor vel bona vel mala esse cognoscatur. Idem aiebant se ab Henrico Gallo rege, ducentos florenos annui salarii, ad leuandam inopiam petiisse:

quos promissos, clandestinus eius è regno excessus,

(dies fuit vel potius nox 18. Iunij anni 1574.)

non fuit habere.

IOHAN-



IOHANNIS LASICII,  
DE INITIO REGIMINIS  
STEPHANI REGIS  
fortissimi.

AD GENEROSISS. VIRVM.

*D. Io. Gaieroski, Surrogatum & Vicecapitanum  
Pofnansensem.*



ENRICO in patriam, morte Fratris cognita, nostris inscijs reuerso, (nox erat 18. Iunij, qua Cracouia excessit) sedecim menses consumti sunt, quibus nobis vanam spem sui reditus faciebat. Tandem indictis Varfauię, Regi constantiori legendo, 8. Nouemb. 1575. comitijs, pars Senatus non exspectato consensu Nobilitatis, cuius est magna apud nos auctoritas, MAXIMILIANVM IMPERATOREM 12. Decemb. pars Nobilitati adhærens, à Germano, metu Turcarum bellum minitantium abhorrenti, STEPHANVM BATORIVM de Somlio, Voiuodam Translyuanie Regem perendie pronuntiat. fit confestim ingens dissensio. Sed Equestris Ordinis consentientis, potiores fuere partes. ac dum cunctatur, accirus à suis bonus MAXIMILIANVS, dissidio intestino permotus: aduolat Cracouiam STEPHANVS, longo per Valachiam circuitu facto, 17. Aprilis, 1576. quingentorum terè equitum Hungarorum, mille peditum iaculatorum comitatu stipatus, vir ad regendam, vel maximam Rempubicam natura factus. Is coronandus Kalend. Maij.

*Duo Reges  
creati.*



*Stephanus  
coronatur.*

matrimonium contrahit cum ANNA SIGISMUNDI PRIMI filia, quam CÆSAR ducere non potuit. paucis post horis, diadema Regium ab Episcopo accipit Cuiaviensi, quod Archiepiscopus Gnesnensis cum Cæsare faceret. prius tamen iurat in leges omnium Regni Ordinum, ac in cōmune fœdus, pacis inter dissentientes Religione conseruandæ.

*Cæsariani  
mutans con-  
silia.*

Quarto ab hinc die, legati Lituanorum, Imperatorias partes tuentium auditi. deinde diuersæ factionis senatores, per literas commonefacti, ut Rege iam Dei voluntate coronato, ea sponte sequerentur consilia, quæ tranquillitatem reipub. adferrent, contraria vitarent. 22. die arcem Landscoronam, præfecturæ Alberti Laski Cæsari addicti, quassatis eius muris, per deditionem capit. 29. Varšauiam iter capessit, ad disturbandum postremum Cæsarianorum concilium, concordie cuiusdam causa ab Archimysta, primas in Regno tenente, indictum. mirabilis tum fuit Cæsaris fautorum ad Regem transirio, & varij redeundi in gratiam modi.

Data omnibus venia. Quod in libera Repub. nefas foret non esse libera suffragia. Deo id beneficium vindicatum, quod animis incolarum magnopere exasperatis, res ad arma non venit. Varšauie Lituanis Rex, & hi vicissim Regi, fidem suam sanctè obstringunt. Tum visa Tikocini SIGISMUNDI AVGVSTI relicta gaza. 26. die mensis Augusti Toroniam venit: penultimo Prussos ad dandum iusiurandum pellicit: breui post Alberto Fridricho Duce in Prussia hos secuto, soli Dantiscani Cæsari, diutius cæteris adhærentes, debita obsequia negabant; quibus rex, immisissis iam ante in territorium illorum cohortibus, non parvam calamitatem intulit.

*Cæsar diem  
obit.*

Interim MAXIMILIANVS, loco regni Sarmatici, 12. Octob. coeleste accipit. quæ ipsi dies finem molestiæ attulit ob heroem Batorium, in regno sibi prælatum. Rex prima, sex hebdomadarum comitia, tertio Decemb. absoluit. in quibus vniuersalis expeditio contra quemuis hostem patriæ constituta, bellum aduersus Dantiscanos. 25. Sepemb. Mariæburgiæ, regia sententia perduelles appellatos, decretum. priuata auxilia à senatoribus promissa.

Vidimus

Vidimus hic captos ab Hungaris Dantiscanorum Germanos pedites vendi denis florenis, alios pluri vel minoris. Inde Bidgostiam animo in bellum Moscoiticum intento digressus, ductis secum Ferbero & Rosenbergio consulibus, nihil non tentauit, ut Dantiscanum negotium absque Martis alea transigeretur. 25. Ianu. 1577. ad 40. capita petitionis ipsorum clementer respondit, & quæ potuit, concessit. At cum postulata superbiora de singulari in leges illorum iureiurando, & oneribus quibusdam, non expectato Comitiorum generalium tempore tollendis, id impedirent; bello 11. Febru. legitime denunciato, frangendam esse ciuium mœnibus fidentium concumaciam statuit. Itaq; egessos portis 16. April. permultos, perendie facto conflictu 4427. cædit. mille capit. e suis, quorum dux erat Io. Sborouius, solum 58. paulo pluribus faucis amittit. 19. Maij Synodus Ecclesiasticorum habita Petricouie sancit, Anathema illum esse, & officio beneficioq; omni priuari debere, qui fœdus Interregni tempore 28. Ianuarij 1573. ad Varšauiam, reclamantibus ordine Ecclesiastico, & quibusdam Catholicis politicis, de pace inter Pontificios & Lutheranos perpetuò seruanda initum approbarit, defenderit eiq; consenserit. Rex Dantiscanos in proposito persistentes 11. Iuni oblident. durauit tres menses obsidio, tam obfessis (licet fortiter se tuentibus) quam obsidentibus, non nihil attritis. Tandem per legatos 12. Principum Germaniæ 9. Decembris pace conciliata, oppugnati, imperium regis, leges illorum omnes approbantis, & religionis Lutheraniæ vsum, ut omnibus alijs permittentis, agnoscunt, ducenta & viginti florenorum millia eidem intra quinquennium numerant. nihil in agro illorum erat, quod non miles biennij propemodum spatio corruerit. proinde magno illis isthæc peruicacia, ab irato peccatis Deo immissa, constitit. Deinde Rex, pacato statu Russiæ, superioribus mensibus incurfione Tartarorum conturbata, 14. Octob. 1578. Leopoli Cracouiã redit: amicitia cum Danis, Suecis ac vicinis Germanis iungenda studet. nihil aliud magis animo volens, quam ut Moscos, Lituanis iniurios, coërceret. Siquidem hac cōditione Rex creatus, ut à Moscis occupata recuperaret, terminos regni prolataret, & ipse bella gereret.

*Bellum Dan-  
tiscanum.*

*Confederatio.*

*Conditiones  
Regis creati.*



*Polozco  
capta.*

*Incipit bel  
li Moscici.*

Inter hæc nouum tribunal, quod regem in bellis occuparum  
curis leuaret, & Petricouia maiorum Polonorum causa, & Lu-  
blini minorum, voluntate omnium instituitur: & nuncij de tan-  
ta strage Moscorum ad Kieffum arcem Liuonicam 24. Octobris,  
ductore Sapieha, adferuntur, vt in fugam versi, viginti tormenta  
grandia victori reliquerint. rursus solum eorundem ad 30. mil-  
liaria Germanica, prope Kerepetz & Derpr, duce copiarum Chri-  
stophoro Radziuilo, mense Februario 1579. euastatum, magnam  
militi prædam peperit. Quocirca Rex, eiusmodi successu anima-  
tus, egressus Cracouia in Lituaniam, Polozco arcem munitissi-  
mam, 30. Augusti hosti adimit. nec maiori negotio capit cæteras,  
videlicet Crassne, Sirno, Cossian, Turovula, Socol, Sussa, Sieuies,  
Niscerna. Cæterum, quò vires maiores audendi maiora facinora  
haberet, reuertit Varfauiam ad Comiticia 22. Nouembris, relictis in  
confinibus Mosciciis, cum exercitu Polono, Mielecio Podoliae  
Voiuoda: cum Litvano, Radziuilo Vilnensi itidem Voiuoda, vi-  
ris expertæ fidei ac virtutis. Venerunt eodem legati Cæsaris Ru-  
dolphi, actum de foederibus, quæ nobis sunt antiquitus cum fa-  
milias Austriacæ. dimissi voti compotes 21. Ianuarij 1580. Exacto  
viritim tributo, conscripta sunt 60. amplius selectissimorum mil-  
lia, æstate ad Czastnicum. 43. ultra Vilnam miliaribus lustrata.  
quibus per loca aquosa traducendis, pons est talis fabricatus, qui  
sex horis cuius flauio, 80. nauibus subiectis, imponi, totidemq;  
rolli potest. hæc nunc copiae, imperatore Ioanne Zamoiscio, Re-  
gni Cancellario litteratissimo, longè lateque effusæ, Mosconiam  
populantur, erepta feliciter recuperant, iniurias vlciscuntur.  
nam res, nec per arbitros decidi, nec per conditiones componi  
potuit. 14. Martij anni superioris, Mosco pacem per legatos Cra-  
couiam missos, & superbè se gerentes petenti, nunciari Rex ius-  
sit, redderet prius oues lupus deuoratas, tum demum pacem spe-  
raret. Habes lector pauca de inclyto rege Stephano, felici

sydere electo: vt finis præfationi responderet.

copiosius hæc, si vita suppetet, singu-  
lari scripto persecuturi.



*Eccelestus Russ. Europ. 1771*

